

NA MVWANDULU YA YANDI



Matondo na nge, Mpangi Neville, Mfumu kusakumuna nge mingi.

Mpe mbote, bankundi. Ya kele ntangu mosi ya mbote na kuvutuka awa na kivinga yayi dyaka na nkokila yayi, mpe kuwa kukondwa kubwa ya Mvwandulu ya Mfumu ya beto, mutindu Yandi pesaka nsilulu. Mpe ntangu yayi, mu zaba ti mingi ya beno me bikana samu na mwa Nsangu na nkokila yayi, samu na yina mu ke vutula matondo mingi. Mpe mingi na kati ya beno fwana nata ditoma kaka na nkokila yayi, samu na kuvutuka na yinzo. Bayankaka me bika yimeni bayinzo ya beno ya banzenza, landila mutindu mu me kuwa. Mpe beto ke meka ve na kusimba beno ntangu ya yinda, samu ti ya kele samu na yina beto me kwiza na ngunga ya mbote samu ti beto kwenda na ntangu ya mbote.

² Mpe ntangu yayi beto ke, kaka nswalu nionso mutindu mu lendaka, mu ke zabisa ntangu beto ke banda, Mu me kuzwa mwa balubokilu na allo-allo na manima ya midi yayi, samu na kuzaba ntangu beto ke banda na zulu ya babuku yayi, to bakapu yayi. Mpe mu banza, kana Mfumu zola, mu ke zola kubaka, ntangu yankaka yina beto ke banda, na zulu ya Bidimbu Sambwadi ya Apocalypse, mpe bidimbu sambwadi ya kimuntu. Mpe, na manima kana beto me manisa na ntangu ya mbote, beto ke baka bidimbu sambwadi yina kele na manima ya Buku, beno me mona. Ntangu yayi, yina lenda baka mwa ntangu fioti. Beno me mona, ya kele bidimbu sambwadi yina me zibuka; ya kele na bampasi sambwadi, bampungu sambwadi, nyonso yango sambwadi; mpe bidimbu yina beto lendaka baka ntete. Kasi na yina na manima ya Buku me kangama na bidimbu sambwadi. Daniel kuwaka bandinga, banzasi, mpe ba pekisaka yandi na kusonika yawu. Ba pekisaka Jean na kusonika yawu. Kasi ba kangaka yawu na mukongo ya Buku, ya zola tuba, na manima ba me zabisa mansweki nionso ya Buku mpe ba me monisa yawu pwelele. Beno tala Daniel tubaka kuna, “Mansweki na bilumbu ya bandinga yayi, mansweki ya Nzambi fwana monisama pwelele na ntangu yina.” Beno me mona, “mansweki,” nani Nzambi kele, wapi mutindu Yandi kumaka muntu, bima nionso yayi fwana monisama pwelele na ntangu yina. Na manima—na manima beto me kubama samu na Bidimbu Sambwadi na mukongo ya Buku, yina ba me monisa ntete pwelele ve na muntu, yina ba me sonika ve na kati ya Biblia, kasi yawu fwana vwanda kaka kieleka ya kufwanakana na Biblia nionso, mpe mu banza ti ya ke vwanda kima mosi ya nene.

³ Na yina ntangu yayi beto ke meka na kusala nswalu samu na kumanisa. Matondo na mosi na mosi ya beno samu na mambote mpe mvwandulu ya beno, mpe—mpe nionso yina beno me sala,

beto ke tonda beno mingi. Mpe ntangu yayi mu—mu ke na kivuvu ti beto ke baka beno ntangu ya yinda ve na nkokila yayi, samu beno kele na mvibudulu mingi ya kuvwanda, ya kutelama. Kento ya munu tubaka na manima kuna, yandi vwandaka zonzila mazono na nkokila, yandi tubaka, “Mu monaka bakento yina vwandaka mpe nene mingi, ya kutelama kuna, mpe bilele ya bawu yina me pola, yina me telama kuna, ke bakula kaka Ndinga nionso.” Ya kele samu na yina mu ke zolaka kuvwanda na nsi ya kupakulama ya Mpeve-Santu, ti ntangu beno ke basika beno ke tuba na bantu yina kele Kieleka ya kusungama, beno me mona, mpe kima yankaka ve kasi Kieleka. Mpe kuna bawu lenda kangama na Yawu mpe ya ke vwanda mbote mingi.

⁴ Ntangu yayi mu zola lomba lemvo ya beno na mwa ntangu fioti. Mu katukaka na suka-suka yayi. Mpe ba me kanga ba-magnetophone na ntangu yayi, mpe mu—mu ke tuba kaka na mwa ntangu fioti ntangu ba ke banda kukanga ndinga na bande. Mu zola kumanisa *Kutanga Ya Manima-nima*, baminuti tanu samu na yawu, na ntwala mu ke kwenda. Mu me zimbana mpe mu me kwenda ntama, mu me kwenda ntama na suka yayi ti mu me basika kukondwa kutuba kima mosi samu na yawu. Kasi, mu bikaka beno fioti mutindu yayi, “Yinki vwandaka kutanga ya manima-nima?” Beno me mona? Mu zaba ti beto kele na kati ya kutanga ya manima-nima, kasi yinki kele kutanga ya manima-nima? Beno me mona? Kana beno zaba ve yinki kele kutanga ya manima-nima, na yina beno ke vwanda fioti na mubulu. Mpe na yina mu—mu ke zola ku—kumanisa yawu, kaka, mpe kumeka kutuba kaka na ndinga ya mutindu na suka yayi samu na kumanisa bande yayi ntangu yayi, na yina ba ke basisa bande yayi, *Kutanga Ya Manima-nima*. Ntangu yayi beno nionso ke lemvo kila munu na mwa ntangu fioti, mpe mu zola kumanisa bande yina. Beno ke sala yawu kaka mwa ntangu fyoti, na manima beto ke banda yankaka? [Dibuundu me tuba “Amen.”—Mu.] Mpe ntangu yayi—ntangu yayi bampangi yina ke kangaka ndinga na bande, kana beno zola, beno zibula bande ya beno ntangu yayi. [Kisika ya mpamba na bande—Mu.]

[Mpangi Branham ke tendula yawu na ba-paragraphe 4-5 ti yandi me kotisa kitini yina vwandaka kondwa na dilongi ya yandi ya suka ba bokilaka *Kutanga Ya Manima-nima*, mutindu mosi na ba-paragraphe 106-111—Mu.]

⁵ Yina me katuka na bisika ya mutindu na mutindu me vutuka kuna, mpe beto me kuzwa ntangu mosi ya kitoko mingi na bansangu tatu ya nsuka, kuna beto me tuba na zulu ya—ya malongi ya mutindu na mutindu mpe bima yankaka yina beto me tuba. Mu ke bambuka moyo ntangu yayi ti mu fwana bika mwa kitini ya fioti awa, beno yina ke kanga ndinga na bande, samu ti beno soba bande ya beno. Mu ke tuba na beno ntangu beno ke banda kukanga ndinga na bande. Mbote mingi. Ntangu yayi, mu fwana tala mbote yayi. Ya ke monana mutindu ya kusala

ya kimuntu, kasi bana-babakala yina fwana kubaka bande. Mpe bawu lendaka ve kuvukisa nionso yayi; kana ba me sala yawu, bantu yina kele kuna ke bakula yawu ve. Na yina beto fwana sala yawu mutindu yayi. Mpe kana muntu mosi lendaka basika kuna na kivinga mpe kusala munu kidimbu kuna, Junior, ntangu ba me kubama samu na kusoba bande kuna. Matondo mingi na beno, bankundi ya munu, mu ke tuba yawu diaka, samu na lutondo ya beno mpe nionso yina. Mbote mingi, beto me kubama ntangu yayi, beno lenda banda na kukanga ndinga na bande.

⁶ Mfumu kusakumuna beno. Beto kele na kyese na kuvwanda awa na tabernacle na nkokila yayi. Kisika ya kifuluka na bantu mingi mingi ya kutelama kuna diaka na nkokila yayi, na bilumbu tatu ya . . . to bambala tatu ya lukutakanu. Mu ke zola ti beno nionso yina ke kuwa bande yayi, ti kana beno ke zola kuvutuka samu na kubaka bande ya mazono na nkokila. Beno longuka yawu na yinzo ya beno. Ya kele kitezo ya ministere ya ntangu yayi yina Mfumu me pesa munu. Mingi-mingi mu ke zola balongi kuwa yawu na ntwala mu kwenda tala bayinzo-Nzambi ya bawu mpe mu ke kwenda na bayinzo ya bawu. Ntangu yayi mu ke zola ti bawu ku—kubaka yawu. Ntangu yayi, na suka yayi beto ke tubila dilongi ya *Kutanga Ya Manima-nima*, Diboundu me yilama samu na kubika.

⁷ Mpe ntangu yayi na nkokila yayi, kana Nzambi zola, beto ke zonzila dilongi ya *Na Mvwandulu Ya Yandi*. Mpe, oh, wapi mutindu beto ke tonda Nzambi samu na ntangu ya mbote yina beto lenda kota na Mvwandulu ya Yandi. Kasi, ntete, mu zola beno nyonso kubaka Babiblia ya beno na munu na profete Ésaïe, kapu ya 6 ya profete Ésaïe. Beto nionso zaba ti Esaïe vwandaka profete ya nene, mpe mosi ya bapofete ya nene ya kilumbu ya yandi. Yandi kufwaka na kuzengama na kuz-scie, samu na kupesa kimbangi, mutindu mhangi na ngolo ya Nzambi ya Ngolo nionso. Na Buku ya Esaïe, kapu 6, mu ke banda na nzila ya 5, samu na kutanga. “Na yina mu me tuba, ‘Kyadi na munu!’ Samu. . .” Mu banza ti mu ke banda na nzila ya 1. Beto lemvolika munu mwa ntangu fyoti. Beto banda na nzila ya 1 mpe beto tanga tii pene ya nzila ya 8.

Na mvula ya lufwa ya ntinu Ozias mu monaka diaka Mfumu me vwanda na zulu ya kiti ya kimfumu, ya zulu mingi, mpe bansongi ya robe ya yandi vwandaka fuluka na tempelo.

Ba-séraphin vwandaka na zulu ya yandi: bawu nionso vwandaka na mapapu sambanu; na zole ba vwandaka fika kizizi ya bawu, mpe na zole ba vwandaka fika makulu ya bawu, mpe na zole ba vwandaka pumbuka.

Mpe mosi bokaka na yankaka, mpe tubaka, Santu, santu, santu, kele MFUMU Nzambi ya makesa: mpe ntoto ya muvimba kele ya kifuluka na nkembo ya yandi.

Mpe makunzi ya kielo ninganaka na ndinga ya yandi yina bokaka, mpe yinzo fulukaka na mulinga.

Na yina mu tubaka, Kyadi na munu! samu ti mu me kufwa; samu ti mu kele muntu ya bikoba ya masumu, mpe mu ke zingaka na kati-kati ya . . . bantu ya bikoba ya masumu: samu meso ya munu me mona Ntinu, MFUMU ya makesa.

Na yina mosi ya ba-séraphin pumbukaka tii kisika mu vwandaka, yandi vwandaka me simba dikala ya tiya na diboko ya yandi, yina yandi bakaka na zulu ya autel na ba-pincette:

Mpe yandi tulaka yawu na yinwa ya munu, mpe tubaka, Tala, yayi me simba bikoba ya nge; mpe disumu ya nge ya nkú me katuka, mpe disumu ya nge me kuzwa lemvo.

Mu kuwaka diaka ndinga ya Mfumu, kutuba, Nani mu ke fidisa, mpe nani ke kwenda samu na beto? Na yina mu tubaka, Munu yayi awa; fidisa munu.

⁸ Bika ti Mfumu kusakumuna Ndinga ya Yandi. Mu banza ti yina kele Masonuku ya kulutila mfunu. Beto ke mona ti, na Mvwandulu ya Nzambi, bantu ke ndima bawu mosi ti bawu kele bansumuki. Beto ke vwandaka mbote mingi mu banza ntangu beto kele kuna na bisika ya mutindu na mutindu, beto ke monana mutindu ti beto kele bantu ya mbote mingi, kasi ntangu beto ke kota na Mvwandulu ya Nzambi, na yina beto ke mona ti beto kele fioti.

⁹ Mu telemaka ntama mingi ve na nkundi ya munu ti mu kuzwaka bweso ya lutwadusu na Klisto, Bert Call, kuna na New Hampshire, nkundi mosi ya muzombi, beto vwandaka ya kutelama pene-pene ya Chute Cold Brook kuna na Adirondack, mpe ya vwandaka chute mosi ya nene mingi. Mu nataka dibuta ya munu na mvula me luta samu na kumona yawu. Ntama mingi na nzila kuna, beno fwana tambula mingi samu na kukuma na kisika yina. Mpe ntangu beto monaka kutiamuka ya masa yina ya blue-vert na ngolo mingi kuna na bamongo, mpe vwandaka tiamuka na zulu ya matadi, Bert telemaka kuna ke tala munu, mpe yandi tubaka, “Fioti, Billy, ya ke salaka ti muntu kumonana kaka fioti *mingi*,” na kutalisaka kati-kati ya centimètre mosi na misapi ya yandi. Mpe mu tubaka, “Ya kele mbote, Bert.” Ntangu yayi, yina vwandaka nionso yandi zabaka samu na kukota na Mvwandulu ya Nzambi, samu na kumona luvangulu ya Yandi.

¹⁰ Mu ke kukiyufula muntu yina sonikaka *Wapi Mutindu Nge Kele Nene*, kana yandi talaka ve na nkokila mosi mpe talaka bambwetete, wapi mutindu ntama yawu kele! Mwa bangonda fioti me luta, Mpangi Fred, Mpangi Wood na munu, vwandaka ya kutelama na Mpangi Mc Anally kuna na ntoto ya kuyuma na Arizona, beto vwandaka teza, beto vwandaka meka, mbwetete

mosi na yankaka. Mpe mutindu yawu vwandaka na ba-millions mpe ba-milliard ya ba-kilomètre, ya monana ti ya vwandaka ve ntama kulutila centimètre mosi mosi na yankaka. Na yina beto bandaka na kubanza, landila yina bantu ya mayele talisaka samu na yawu, bambwetete yango kele na kutala ntama mingi na mosi na yankaka kulutila ti beto kele na yawu. Beno me mona mutindu ya kele?

¹¹ Na yina beto ke bakula wapi mutindu beto kele fioti ntangu beto ke bakula wapi mutindu Yandi kele nene, mpe wapi mutindu beto me kuma pene-pene na Mvwandulu ya Yandi. Na mutindu mosi to yankaka, kukota na Mvwandulu ya Nzambi ke salaka ntangu nionso diambu ya nene na bantu. Mu me monaka na ministere ya munu ntangu beno ke mona Mvwandulu ya Nzambi ke kwisa na kisika mosi ti ya ke nata muntu mosi na kukwisa na ntwala mpe kutalisa yandi luzingu ya yandi, mpe kuzabisa masumu ya yandi mpe mambu ya nsoni ya mutindu na mutindu, mpe ya ke nataka bantu na kati ya pima ya busantu tii kuna bawu ke basika na ndonga ya bisambu ntete bawu kwisa samu ba sambila bawu, mpe ba ke kima mbangu na autel mpe vwandaka kusungama na Nzambi ntete bawu kota na Mvwandulu ya Yandi. Beno me mona, kima mosi ke salaka ti ntangu beno ke kota na Mvwandulu ya Nzambi, yawu ke salaka ti mambu kusalama. Mu me monaka bantu yina vwandaka ya kulala na ba-civière mpe ba brancard.

¹² Na nkokila yina kuna na Mexico, ntangu bébé yina ya fioti ya kufwa vwandaka na nsi na bulanketi mosi, mama yina ya fioti ya Espagnole nataka yandi na ntwala, to mama ya fioti ya Mexicaine, mu zola tuba, nataka yandi na ntwala. Ntangu bawu monaka, mafunda mingi ya bantu yina monaka, mu banza makumi tanu to makumi sambwadi na tanu vukanaka, yina monaka bébé yina kufwaka mpe vutukaka na luzingu, bakento kubwaka ngambu, bantu telemisaka maboko na zulu mpe ba vwandaka kuboka. Samu na yinki? Bawu bakulaka ti muntu lenda sala mutindu yina ve, ti bawu vwandaka na Mvwandulu ya Nzambi ya Ngolo nionso. Mpe ya salaka ti kima mosi kusalama.

¹³ Mu me kuzwa ntangu ya mbote na kuwa bantu ya santu kuzonza. Bawu zonzaka kilumbu mosi samu na Charles Finney, mwa muntu mosi ya fioti, yina vwandaka ata fioti ve na ba-kilo na zulu ya makumi tanu, kasi yandi vwandaka tuba na mutindu mosi ya ngolo ti. . . Kilumbu mosi yandi vwandaka meka acoustique ya kivinga mosi. Ba vwandaka ve na ba-systeme P.A. na ntangu yina. Mpe muntu mosi vwandaka sala bisalu ya kuyidika, kuna na balcon, to kuna na zulu ya muludi ya kivinga, mpe yandi kuwaka muntu yina vwandaka kota, na yina yandi zabaka ve nani yandi vwandaka, yandi vwandaka kaka swi. Mpe Tata Finney zolaka kumeka ba-acoustique. Na manima ya kulutisa ntangu mingi na bisambu samu na reveil yina yandi zolaka sala, yandi mekaka ndinga na yandi samu na kutala yinki

mutindu yawu ke sala. Yandi belamaka na chaire na nswalu nionso, mpe tubaka, “Beno balula ntima, to beno kufwa!” Mpe yandi tubaka yawu na ngolo—ngolo, na manima ya kuvwanda na nsi ya kupakulama ya Nzambi, ti bakala kubwaka katuka na zulu ya balcon, tii na ntoto, to, katuka na zulu ya kivinga, tii na ntoto.

¹⁴ Yandi longaka Nsangu ya mbote na mutindu yina tii kuna yandi telemaka na Boston, na Massachusetts, na mwa nela mosi ya kubenda, samu ti ya vwandaka ve na dibuundu yina zolaka vwanda na nkonga ya yandi. Mpe yandi telemaka kuna na kubasisa ngolo ya mutindu yina, mpe yandi vwandaka longa difelo mutindu kisika yina ya boma mingi, ti misadi na bitunga ya bawu na nsi ya mapeka, vwandaka kuna na kati ya bala-bala mpe vwandaka boka samu na kulomba mawa. Na Mvwandulu ya Nzambi! Balongi ya nene yina vwandaka na kiyeka, na nzila ya Ndinga ya Nzambi, samu na kunata Mvwandulu ya Nzambi na bantu. Ntama na beto dibanza yayi ti bantu kuvwanda na bantima ya ngolo mingi ti bawu lendaka ve kuzaba Mvwandulu ya Nzambi. Ntama na beto dibanza ya mutindu yina!

¹⁵ Ntangu muntu ya ntete, na ntangu yandi sumukaka mpe yandi salaka kima ya yimbi, mpe na ntangu Nzambi kwisaka na ntwala ya yandi, to, yandi kotaka na Mvwandulu ya Nzambi, “Adam,” yandi lendaka ve kutelama na Mvwandulu ya Nzambi. Yandi kimaka mbangu mpe yandi bumbamaka na kati ya matiti mpe yandi mekaka na kufika dititi ya fiki, samu yandi zabaka ti yandi vwandaka ya kutelema na Ntwala ya Yehowa, Mvangi. Yawu yina vwandaka diambu ya muntu ya ntete, na manima yandi sumukaka mpe mekaka na kukota na Mvwandulu ya Nzambi na disumu na zulu ya moyo ya yandi. Yandi lendaka ve kubumbama, samu yandi vwandaka diaka na lembami. Disumu vwandaka me kota ve na kati ya bantima ya bantu mutindu yawu me kota bubu yayi, kasi yandi vwandaka na luzabu ti yandi vwandaka ya kutelema na ntwala ya Mvangi ya yandi. Ntangu yayi, yandi kukibumbaka yandi mosi na kati ya matiti mpe yandi lendaka ve kubasika, mpe lendaka ve kubasika tii kuna Nzambi kukubikaka mambu samu na yandi.

¹⁶ Beto lenda vutuka, mpe kubaka na Genèse kapu ya 17 mpe nzila ya 3, ntangu nkooko yayi ya nene, Abraham, ntangu yandi kotaka na Mvwandulu ya Nzambi, mpe Nzambi zonzaka na yandi (na kapu ya 17) na Nkumbu ya Nzambi ya Ngolo nyonso, Abraham kubwaka na kizizi ya yandi. Nkooko yayi ya nene, kisadi ya Nzambi, lendaka ve kutelema na Mvwandulu ya Nzambi, ata ti Yandi sadilaka Yandi bamvula makumi zole na tanu, ya kukwikama. Kasi ntangu Nzambi kotaka na mvwandulu ya yandi, nkooko yayi kubwaka na kizizi ya yandi samu ti yandi lendaka ve kutelama na Mvwandulu ya Nzambi.

¹⁷ Na Exode 3, beto ke mona ti Moïse, kisadi ya nene mpe profete ya Nzambi, ntangu yandi vwandaka kuna na manima

ya ntoto ya kuyuma, ti bakala yina vwandaka muntu ya santu. Yandi butukaka samu na lukanu mosi. Yandi butukaka na kivumu ya mama ya yandi samu na kuvwanda profete. Yandi mekaka na kuzwa ndongosolo ya yandi mpe kusala nyonso yina yandi lendaka samu na kuvulusa bantu ya yandi, samu ti yandi bakulaka ti yandi zolaka vulusa bantu ya yandi, kasi na ntangu yina yandi bakulaka yawu na mutindu ya théologie. Ba longusaka yandi. Yandi kuzwaka malongi ya mbote. Yandi lendaka longa ndwenga ya ba-Egyptien, yina vwandaka bantu ya kulutila mayele na yinza. Yandi zabaka mambu nionso mbote-mbote. Yandi zabaka Masonuku kubanda na A tii na Z. Yandi zabaka bansilulu yina Nzambi salaka. Yandi zabaka yawu landila malongi ya bantu. Mpe yandi vwandaka soda ya nene. Kasi kilumbu mosi na manima ya ntoto ya kuyuma, ntangu yandi kotaka na Mvwandulu ya Nzambi, yandi katulaka basapatu ya yandi mpe yandi kubwaka—na makulu ya yandi, na kuzabaka ti yandi vwandaka na ntoto ya santu. Yandi lendaka telama ve ntangu yandi kotaka na Mvwandulu ya Nzambi, yandi kubwaka na kizizi ya yandi mutindu Abraham salaka. Yandi lendaka ve kutelama na Mvwandulu ya Nzambi.

¹⁸ Na Exode 19:19, ntangu bantu yina Nzambi soolaka kubanda ntama kuna na bilumbu ya Abraham, na Abraham kwisaka Isaac, na Isaac kwisaka Jacob, na Jacob kwisaka bankooko, mpe bamvula na manima ya bamvula basisaka babakala ya santu, babakala ya nene, bantu yina ba me soolaka, dikanda yina ba me soolaka, bantu ya kusantisama, bantu ya santu, mpe sadilaka Nzambi luzingu na bawu ya muvimba. Mpe kilumbu mosi Nzambi tubaka, “Vukisa Israel awa, Mu ke tuba na bawu.”

¹⁹ Kasi ntangu Nzambi kulumukaka na zulu ya Mongo Sinaï, mpe mongo ya muvimba bakaka tiya, mpe mulinga vwandaka basika na yawu mutindu dibulu ya tiya, mpe Ndinga ya Nzambi basikaka mutindu makelele, Israel kubwaka na kizizi ya bawu mpe tubaka, “Bika ti Moïse kutuba, kasi Nzambi ve, kana ve beto ke kufwa.” Muntu, na Mvwandulu ya Nzambi, ke bakula ti yandi kele nsumuki! Kasi ba kuzwaka nzengolo, bawu nionso, landila Musiku. Bawu vwandaka zitisa misiku mpe nionso yina, kasi ntangu Nzambi tubaka mpe bawu kotaka na Mvwandulu ya Yandi, bawu bakulaka ti bawu vwandaka na nganda, bawu vwandaka—bawu vwandaka mbote ve, kima mosi vwandaka kondwa, samu bawu vwandaka na Mvwandulu ya Nzambi. Yinga. Mpe bawu tubaka, “Bika ti Moïse kutuba, kasi Nzambi ve, samu kana Nzambi kutuba beto nionso ke kufwa. Bika ti Moïse kutuba na beto.”

²⁰ Ya vwandaka na Luc 5:8, ti ntangu Pierre...oh, ntangu yandi vwandaka muntu ya yintu-ngolo, mpe muntu ya lukumu ya nene, na ngolo ya nene na yina beto ke bakula. Yandi vwandaka mutindu muntu ya kingolo-ngolo, mulobi yina me

zabana mingi. Kasi ntangu yandi monaka kimangu ya Nzambi kusalama na nzila ya Muntu mutindu muntu nyonso, na yina, yandi zabaka na ntangu yina ti ya lombaka kuvwanda kulutila muntu samu na kutula bambisi yina nionso na kati ya filet na ntangu yandi, na luzabu yina nionso ya lukolo, ya kuloba mbisi, yandi lobaka mpimpa ya muvimba mpe yandi kuzwaka kima ve. Kasi yandi kuwaka Muntu mosi kutuba, “Beno losa filet na beno.”

²¹ Mpe ntangu yandi bandaka na kubenda, yandi kuzwaka mbisi ya nene, mpe yandi bakulaka ti yandi vwandaka muntu ya masumu. Mpe yandi tubaka, “Kwenda ntama na munu, O Mfumu, samu mu kele muntu ya masumu.” Nani tubaka yawu? Santu Pierre, na Mvwandulu ya Nzambi, lombaka na Nzambi na kubasika na mvwandulu ya yandi, samu yandi zabaka ti yandi vwandaka nsumuki.

²² Abraham zabaka ti yandi salaka “yimbi.” Adam zabaka ti yandi salaka “yimbi,” yina vwandaka mwana ya Nzambi, yandi zabaka ti yandi salaka “yimbi.” Moïse ndimaka ti yandi salaka “yimbi.” Israel, mutindu dibuundu mpe yinsi, ndimaka ti bawu salaka “yimbi.” “Kwenda ntama na munu, samu mu kele muntu ya masumu.” Yandi mekaka ve na kutuba, “Ntangu yayi, mu kele santu mpe yina me lunga samu na kuzwa yayi.” Yandi tubaka, “Mu kele muntu ya masumu.”

²³ Kilumbu mosi bakala mosi ya nsambulu, na théologie nyonso yina yandi zolaka longuka na mulongisi ya nene yina ba vwandaka bokila Gamaliel, nkumbu ya yandi vwandaka Saul ya Tarse, yina beto me zaba na nkumbu ya Paul, muntu ya nsambulu tii na mikwa. Yandi zabaka nsambulu ya bawu ya muvimba. Yandi vwandaka Pharisien yina me butuka Pharisien, mpe Hebreux yina me butuka Hebreux. Yandi vwandaka bakala ya lukumu, ya ndwenga, ya mayele, ya ngangu, ya kulonguka, yina tubaka ti yandi zabaka Nzambi kubanda bubébé. Kasi kilumbu mosi ntangu yandi vwandaka na nzila ya Damas, Dikunzi yina ya Tiya semaka na zulu ya yandi mpe yandi kubwaka na . . . na makulu ya yandi, na ntoto, na kati ya putulu, mpe tubaka, “Mfumu, yinki Nge zola ti mu sala?” Malongi ya yandi nionso ya nene, malongi ya yandi nionso ya théologie, malongi ya yandi nionso vwandaka tuba kima mosi ve na ntangu yandi telemaka na Mvwandulu ya Nzambi.

²⁴ Mu ke zola kutelama awa mwa ntangu fyoti mpe kutuba ti ya kele kima mutindu mosi. Beno lenda vwanda na Doctorat na Théologie, Doctorat na Philosophie, nionso yina beno lendaka vwanda, beno lendaka vwanda muntu yina ke kwendaka na yinzo-Nzambi kubanda bumwana, beno lendaka sala bisalu nionso muntu ya nsambulu, kasi ntangu beno ke kota na Mvwandulu ya Nzambi beno ke kukitala fioti mingi mpe ya mpamba.

25 Paul bakulaka ti yandi salaka yimbi, mpe yandi kubwaka na ntoto, na nsi ya kubendama mpe Ngolo. Ntangu yandi talaka na zulu mpe monaka Nzambi ya kieleka yina yandi longaka, mpe . . . yina yandi kutelemina, mpe banzaka ti yandi zabaka, mpe monaka ti yandi vwandaka na yimbi, yandi kubwaka na makulu ya yandi, na ntoto, samu yandi vwandaka na Mvwandulu ya Nzambi. Yandi monaka Dikunzi ya Tiya yina.

26 Wapi mutindu samu na Santu ya nene Jean ya Apocalypse 1:7, ntangu yandi talisaka vision, mpe talaka, mpe kuwaka Ndinga mosi kutuba na yandi? Mpe yandi balukaka samu na kutala Ndinga, mpe yandi monaka minda sambwadi ya wolo. Mpe Mosi vwandaka ya kutelama na kati-kati ya minda sambwadi, na bansuki mutindu mika ya dimeme, meso mutindu milaka ya tiya, makulu mutindu makunzi ya kisengo, Yandi vwandaka na mukaba ya wolo na ntulu, mpe ba bokilaka Yandi Ndinga ya Nzambi. Mpe ntangu Santu ya nene Jean yina tambulaka na Klisto, yina yekamaka na ntulu ya Yandi, ntangu yandi salaka bima nionso yayi! Mutindu mu tubaka na suka yayi, ministere ya Paul vwandaka na zulu mingi kulutula yina ya bantu yankaka. na yina, na manima Jean tambulaka na Yesu, solulaka na Yandi, lalaka na Yandi, kudiaka na Yandi, kasi ntangu yandi monaka Yandi ya kutelama kuna, na kitezo yina ya nkembo, yandi tubaka ti yandi kubwaka mutindu muntu ya kufwa na makulu ya Yandi. Amen. Beno banza na yawu!

27 Beto lenda kwisa na dibuundu mpe kutuba mpe kupesa lukumu na Nzambi, mpe nionso yina, kasi, oh, mpangi-bakala, ntangu beto ke mona Yandi ke kwisa, kima mosi ke vwanda ya luswaswanu na kati ya bantima ya beto! Beto lenda banza ti beto ke salaka kisalulu ya beto ya nsambululu na kukwendaka na yinzo-Nzambi mpe kufuta bikunku kumi ya beto. Beto lenda banza ti beto ke zitisaka misiku ya dibuundu mpe ke vutukilaka bacrede nyonso, kasi na ntangu beto ke tala Yandi, mambu nionso me soba nzila. Yinga, ya kieleka.

28 Muntu yayi ya nene, Santu Jean, muntu mosi ya nene mutindu yina, Biblia ke tuba na Apocalypse 1:7, ti “yandi kubwaka mutindu ti yandi vwandaka muntu ya kufwa.” Na manima ya bamvula tatu na ndambu ya kubundana na Klisto, yandi vwandaka mosi ya misoniki ya Mikanda, yandi sonikaka na manima ya Yandi, yandi kudiaka na Yandi na mesa, Yandi lalaka na yandi na mbeto, mpe yandi vwandaka na kimpangi na Yandi bisika nionso Yandi vwandaka kwenda, kasi ntangu yandi balukaka na kutala Yandi, yandi vwandaka diaka ve na luzingu na kati ya yandi. Yandi kubwaka mutindu bakala ya kufwa na nsi, to na ntoto. Mbote mingi.

29 Beto ke mona Esaie, na Esaie 6:5, mutindu beto me tanga yawu, profete yayi ya nene ya ngolo, yandi kele mosi ya baprofete ya kulutula nene yina kele na kati ya Biblia. Ya kele na Babuku makumi sambanu na sambanu na kati ya Biblia; ya kele na

bakapu makumi sambanu na sambanu na Esaïe. Esaïe ke banda na Genèse, kati-kati ya Esaïe ke talisa Ngwisani ya Malu-malu, nsuka ya Esaïe ke talisa na Millenium; ya kieleka kaka Genèse, Ngwisani ya Malu-malu, mpe Apocalypse. Ya kele ya kulunga! Esaïe vwandaka mosi ya bapofete ya nene. Kasi kilumbu mosi yandi vwandaka pema na zulu ya diboko ya Ozias ntinu ya nene, ba katulaka yandi Ozias, mpe yandi vwandaka na mawa. Yandi vwandaka muntu ya mbote mingi, yandi vwandaka muntu ya kusungama, samu ti ntinu yina ya mbote (ntinu mosi ya mbote) zabaka yandi mutindu muntu ya santu mpe zitisaka yandi na tempelo ya yandi.

³⁰ Esaïe monaka ba-vision. Yandi vwandaka profete. Esaïe longaka Ndinga. Yandi vwandaka longi. Esaïe vwandaka muntu ya santu. Kasi kilumbu mosi, na kutelemaka na tempelo, yandi kotaka na transe mpe yandi monaka Nkembo ya Nzambi. Yandi monaka Bawanzio na mapapu na zulu ya kizizi ya Bawu, mapapu na zulu ya makulu ya Bawu, ke pumbuka na mapapu, ke boka, “Santu, santu, santu kele Mfumu Nzambi ya Ngolo nionso!”

³¹ Profete yango bakulaka ti yandi vwandaka kima mosi ve. Yandi tubaka, “Kyadi na munu, samu ti mu kele muntu ya bikoba ya masumu.” Profete, profete ya kulutila nene ya Biblia, mosi na kati ya bawu. “Mu kele muntu na bikoba ya masumu, mpe mu ke zingaka na kati-kati ya bantu yina kele na bikoba ya masumu. Kyadi na munu, samu ti mu me mona Nkembo ya Nzambi.”

³² Mpe yandi tubaka, ntangu Wanzio yina bokaka, “makunzi ya tempelo ninganaka.” Mpangi-bakala, yina ke sala ti beno. . . Ya kele kaka ve ti makunzi ya tempelo ke ningana, kasi mazulu ya muvimba mpe ntoto ke ningana ntangu Yandi ke kwisa diaka. Bamongo ke tina, mpe mubu ke zimbana, mpe kuboka, “Bumba beto na kizizi ya Yandi yina kele ya kuvwanda na zulu ya Kiti ya kimfumu.” Ya ke vwanda ntangu mosi ya mpasi. Mu ke tuba na nge, nkundi ya munu ya nsumuki, nge ke sala mbote na kufiongonina yawu. Ya kele kieleka.

³³ Ntangu yayi, Esaïe tubaka, “Kyadi na munu, mu kele muntu ya bikoba ya masumu, mpe mu ke zingaka na kati-kati ya bantu ya masumu. Mpe mu kele, bantu yayi ke na bikoba ya masumu.”

³⁴ Ntangu yayi beno bambuka moyo, kana bantu ya santu ndimaka ti bawu vwandaka “bansumuki” na Mvwandulu ya Nzambi, yinki ke sala nsumuki mpe muntu ya kukondwa busantu na Kilumbu yina? Yinki bantu yayi vwandaka na balukutakanu ke sala? Yinki ke sala bantu yina me mona Ngolo ya Nzambi, yina me kuwa kutanga ya manima-nima na zulu ya Ndinga, yina me monaka Nzambi ke kukitalisa Yandi mosi, mpe (kukondwa ntembe) Masonuku nionso me lunga, mpe ke meka na kukwenda na Mazulu kukondwa kubutuka mbala zole mpe kuzwa Mpeve-Santu? Biblia me tuba, “Kana muntu ya

mbote ke vuluka na mpasi, yinki ke salama samu na nsumuki mpe muntu ya kukondwa busantu?” Wapi mutindu ya kisika beto ke telama kana beto mona Nzambi me monisama pwelele Yandi mosi kieleka na ntwala ya beto, mpe kumona Nkembo ya Nzambi kaka mutindu mosi na bantu yina monaka, mpe bantu ya mutindu bokaka, bapofete mpe bantu ya ndwenga na zulu ya bawu Ndinga me kuzwa lufulu? Kana bawu bokaka, mpe bawu kubwaka na makulu ya bawu, mpe ke bokaka, “Mu kele muntu ya bikoba ya kukondwa busantu ve, ya masumu,” yinki ke vwanda samu na muntu yina ke zolaka ve kufungana masumu ya yandi? Yinki ya ke vwanda samu na ntwenya ya bakala to ntwenya ya kento yina ke zolaka ve kufungana masumu ya yandi? Yinki ya ke vwanda samu na muntu yina ya mpasi yina ke banzaka ti yandi zaba mingi samu na yina me tala luvangulu ya Nzambi kulutila Nzambi ke salaka Yandi mosi? Yinki ke salama samu na muntu yina me bebisa luzingu ya yandi nionso na kutubaka ti Biblia kele ya luvunu? Wapi kisika muntu yina ke vwanda? Beno banza na yawu!

³⁵ Yayi kele kumwangisa nsangu ya mbote. Yayi kele ntangu ya kuningisa bantu. Yayi kele ntangu yina Nzambi tubaka ti ya ke kwisa, Yandi ningisaka Mongo Sinaï kilumbu mosi kasi ya ke vwanda diaka na kuningana, ti Yandi “lendaka kaka ve kuningisa Mongo Sinaï, kasi Yandi lendaka kuningisa bima nionso yina lendaka ningana.” Kasi beno me mona kitini yina ya Masonuku? “Kasi beto ke kuzwa Kimfumu yina lendaka ve kuningana!” Alleluia! Bima nionso yina lendaka ningana ke ningana. Mazulu ke ningana. Ntoto ke ningana. “Mazulu mpe ntoto ke luta, kasi Ndinga yayi mu ke tunga Dibundu ya Munu, mpe bamwelo ya difelo ke nunga Yawu ata fioti ve.” Bima nionso yina lendaka ningana ke ningana. Kasi beto ke kuzwa Kimfumu yina kele Ndinga ya Nzambi Yandi mosi, mpe Nzambi kele Ndinga ya Yandi. Yandi ke ningana ve Yandi mosi. Amen! Oh, la la! “Kasi beto ke kuzwa Kimfumu yina lendaka ningana ve,” ya kele yina ke ningana ke ve, Paul musoniki ya Hébreux tubaka.

³⁶ Muntu ya mutindu yayi mpe bakala ya mutindu yayi, ntangu ya mutindu yayi mpe wapi mutindu ya nsatu bawu kuzwaka! Beto mpe, beto mosi, beto me mona Nkembo ya Nzambi mutindu bantu yayi monaka. Kieleka. Beto me mona Yawu. Beto monaka Nkembo ya Nzambi mutindu Abraham monaka Yawu. Beto monaka Nkembo ya Nzambi mutindu Moïse monaka Yawu, Dikunzi ya Tiya ya mutindu mosi, Ngolo ya Nzambi ya mutindu mosi, Klisto ya mutindu mosi me mo- . . . me kukitalisa Yandi mosi, me monisama Yandi mosi, yina ke zitisa Ndinga ya yandi na kilumbu yayi ya nsuka. Wapi mutindu beto lendaka kwisa na kisika yayi, kutambula mpe kutala Yawu mpamba? Wapi mutindu beto lendaka tambula mutindu yayi mpe kukangama na ba-credo ya beto mpe ba-denomination ya beto, mpe kumanga

na kundima Ndinga ya Nzambi? Yinki ya ke vwanda samu na beto na Kilumbu yina? Wapi mutindu ya ke salama na beto, ntangu beto me mona Nkembo ya Nzambi?

³⁷ Bantu yankaka ke telema mpe ba ke sawula Yawu, bayankaka ke seka Yawu, bayankaka ke bokila Yawu bufanatiki, bayankaka ke bokilaka Yawu télépathie mentale, bayankaka ke bokila Yawu Béelzébul, bayankaka ke bokila Yawu kima mosi to yankaka. Mutindu kingana ya ntama me tuba, “Bilawu ke tambula na basapatu ya bawu ya bansonso kisika Bawanzio ke bangaka na kudiata.” Ya kieleka. “Kilawu ke tuba na kati ya ntima ya yandi, ‘Nzambi kele ve.’” Ntangu yandi me mona Nzambi me monisama na mutindu ya kulunga na nzila ya Ndinga ya Yandi Mosi (na nzila ya credo ve; kasi na nzila ya Ndinga ya Yandi), mpe na manima yandi ke niata Yawu mpe ke seka Yawu, yandi kele kilawu. Samu ti, ya kele, Nzambi kele Ndinga, mpe Nzambi monisama Yandi mosi pwelele na yandi, mpe yandi kele “kilawu,” Biblia me tuba. Yinki ya ke vwanda samu na yandi ntangu yandi ke telama na kisika yina? Ya ke vwanda—ya ke vwanda mpasi samu na muntu yina na Kilumbu yina, muntu ya kukondwa busantu.

³⁸ Bansumuki yina me balula ntima, ke vwanda na boma mosi ve. Oh, ve. Nsumuki yina ke balula ntima, yandi zaba ti ya kele na Munkayulu ya menga ke vingila, samu na kutelema na kisika ya yandi. Yawu yina ke pesaka munu kikesa. Mu me monaka nkembo ya Nzambi. Mu me kuwaka ngolo ya Yandi. Mu zaba kusimba ya diboko ya Yandi. Mu zaba kusimba ya kitumbu ya Yandi. Mu zaba ti Yandi kele Nzambi. Mpe mu zaba ti mu me zimbama, kasi ya kele na Mosi yina me telama kuna samu na munu. Amen. Ya kele na Mosi Yina me telama kuna mpe ke tuba, “Tata, tula masumu ya yandi nionso ya nkú na zulu ya Munu, samu yandi telemaka kuna samu na Munu na zulu ya ntoto.” Alleluia! Na yina mu ke tambula na Kiti ya kimfumu ya Nzambi, na kivuvu nionso, na kuzwa lemvo na kati ya ntima ya munu, na kuzaba ti ya kele ve na nzila ya bisalu ya mbote, kasi na nzila ya mawa ya Yandi mu me vuluka. Ya kele ve yina mu lendaka sala, kisika yina mu lendaka kota, yina mu lendaka tuba; kasi ya kele na nzila ya lemvo ya Yandi ti Yandi me vulusa munu.

³⁹ Kuyituka ve ti poète yina bakulaka yawu, yandi bokaka, “Lemvo ya ngitukulu, muningu ya kitoko, yina me vulusa muntu ya kiadi mutindu munu. Mu wandaka ya kuzimbana, kasi ntangu yayi ba me kuzwa munu; mpofu, kasi ntangu yayi mu me mona.”

⁴⁰ Wapi mutindu mu lendaka kwenda na Mazulu? Wapi mutindu beno ke kwenda na Mazulu? Beto lendaka ve kusala yawu, beto, mpe beto kele ve na mutindu ya kusala yawu. Kasi ya kele na Mosi yina salaka nzila. Mpe Yandi kele Nzila. Mpe wapi mutindu beto ke kuma na Yandi? Na nzila ya Mpeve mosi, Mpeve ya Yandi, beto me botama kati ya Nzutu mosi yina ke

vumbuka mutindu orbite mosi. Beto ke basika na ntoto mutindu ba-astronaute ya kilumbu yayi nsuka na lukwikilu ya Nzambi. Amen. Kieleka. Bansumuki yina me balula ntima ke vwanda ve na boma, Muntu mosi kele kuna na kisika ya bawu.

⁴¹ Oh, na yina na manima beto me kota na Mvwandulu ya Yandi ntangu yayi, mpe beto zaba ti beto vwandaka na Mvwandulu ya Yandi, beto me mona Yandi kusala bima yina Yandi salaka ntangu Yandi vwandaka awa na zulu ya ntoto. Wapi mutindu beno ke zaba . . . Wapi mutindu beno ke zaba ti vinu yina beno ke na kutala? Samu yawu me buta mbuma. Wapi mutindu beno ke zabaka dibuundu yina beno ke kwendaka? Na nzila ya bambuma ya yawu. Yesu tubaka, “Yandi yina ke kwikila na Munu, yandi mpe ke sala bisalu yina Mu ke sala. Bidimbu yayi ke landa bayina ke kwikila.”

⁴² Ntangu yayi, beto ke mona ti Yandi tumaka beto ve na kusala ba-denomination. Yandi tumaka beto ata fioti ve na kukwenda kusala ba-credo. Yandi kebisaka beto samu na bima yina. “Samu ti muntu nyonso yina ke katula kima mosi na Yawu to ke bwela kima mosi na Yawu, ba ke katula bawu kitini ya bawu, na Buku ya Luzingu.” Beno me mona?

⁴³ Na yawu, ba tumaka beto ve na kusala kima ya mutindu yayi kasi kukangama na Ndinga yayi. Mpe kana Nzambi me fidisa muntu mosi, yandi ke kangama na Ndinga, samu Nzambi lendaka kaka kufidisa na nzila ya Ndinga ya Yandi. Beno me mona? Beno me mona, Yandi fwana kukangama na Ndinga ya Yandi. Na yina ntangu beto ke kota na Mvwandulu ya Yandi, na ntangu muntu mosi ke kota na Mwandulu ya Nzambi, yandi ke soba kukondwa nsuka, kasi na kati ya yandi nsobolo mosi lendaka salama. Ntangu yayi, ya kele na bantu yina lendaka kota na Mvwandulu ya Nzambi mpe kukondwa kusala keba na Yawu. Yandi me tumama ve samu na Luzingu. Kasi kana Nzambi zabaka yandi na mantwala, ntangu kaka yawu ke salama, yandi ke zaba yawu. Tiya mosi ke pela.

⁴⁴ Beno tala mwa kento yina ya kindumba kuna kilumbu yina na Samarie, kento yina. Yandi vwandaka na kimbevo ya yintu mpe na nzutu. Beto zaba yawu. Kasi kaka na ntangu yandi monaka kidimbu yina me salama, ya Mesiya, yandi tubaka, “Beto zaba ti Mesiya ke kwisa kusala yayi. Nge fwana vwanda profete ya Yandi.”

Yandi tubaka, “Mu kele Mesiya yina ba sonikaka ke kwisa.”

⁴⁵ Yandi zabaka yawu. Yandi yufulaka ata fioti ve kiuvu mosi. Yandi kotaka na nzila na nswalu nionso samu yandi vwandaka na kiyeka mosi, yandi zabaka ti kana yandi monaka yawu mpe kotaka na Mvwandulu ya Nzambi, yandi vwandaka na kiyeka ya kutuba yawu na muntu yankaka. Alleluia! Kieleka. Muntu nionso yina ke kota na Mvwandulu ya Nzambi kele na kiyeka na ntwala ya Nzambi, kubanda na muniti yina, samu

na kutuba na muntu yankaka. Beno tala Abraham, beno tala Moïse, beno tala Pierre, beno tala Paul. Na ntangu bawu kotaka na Mvwandulu ya Nzambi, bawu zabaka bawu mosi ti bawu vwandaka “bansumuki,” mpe kangaka kimbangi ya bawu na luzingu ya bawu. Beno tala mama yayi ya leke, yandi lendaka ve kutelama diaka, yandi kwendaka na mbanza mpe tubaka na bantu, “Beno kwisa, tala Muntu yina me tuba na munu mambu yina mu salaka. Yayi kele Mesiya ve?” Bawu lendaka manga Yawu ve, samu Yawu vwandaka Masonuku. Ya kieleka. Yinga, bawu fwana kusala yawu, bakala mosi, ntangu beto kele na kiyeka ya kutuba na bantu yankaka mutindu Moïse salaka, mutindu Pierre salaka, mutindu Paul salaka. Na manima ya bima yayi, beno me mona Yawu mpe beno me kota na Mvwandulu ya Yandi, beno kele na kiyeka ti Nsangu kukuma na muntu yankaka. Beno lenda kaka ve kuvwanda swi na Yawu. Beno fwana kunata Yawu na muntu yankaka.

⁴⁶ Mu ke bambuka moyo na mpangi-kento ya kiboba yina vwanda vwandaka awa, mama ya Mpangi Graham Snelling, yandi vwandaka vwanda kaka awa na yinzo-Nzambi, mpe yandi lendaka yimbila, “Mu me zabuka! Mu ke kima mbangu, mbangu, mbangu, mpe mu me zabuka mpe mu ke vwanda ve kisika mosi.” Yandi monaka kima mosi. Mu kwendaka na mwa dibuundu mosi ya bantu ya ndombe awa na Louisville, mpe bawu nionso vwandaka ya kutelama kuna, ba vwandaka yimbila, “Mu ke mata na Nzila ya Ntinu, mu me kuzwa Yawu, mpe mu ke mata na Nzila yayi!”

⁴⁷ Ya kele na kima mosi samu na yawu, ntangu beno ke mona Klisto, beno lenda diaka ve kuvwanda swi. Beno kele muntu yina me soba samu na bilumbu ya beno me bikana, samu ntangu luzingu mpe Luzingu me vukana, ya ke pesa Nsemo ya nene. Ya kieleka. Ntangu ampoule me kangama na nsinga, kana ya kele ampoule ya mbote, ya ke pesa nsemo; ntangu courant mpe ampoule ke vukana, ya ke pesa kaka nsemo. Ya ke sala yawu kaka. Mpe ntangu bakala mosi to kento mosi me tumama samu na Luzingu ya Kukonda nsuka, mpe ba ke mona courant ya Nzambi ke luta na ampoule yina, ya ke mwangisa Nsemo bisika nionso. Beno lendaka vwanda kaka ampoule ya ba-watt kumi, kasi beno ke mwangisa Nsemo nionso yina kele na beno. Kana beno kele ve yina ya ba-watt nkama tanu, beno mwangisa Nsemo ya ba-watt kumi. Beno pesa Nsemo ya beno! “Bika ti nsemo ya nge kusema na ntwala ya bantu, ti bawu lenda mona bisalu ya beno ya mbote mpe kukembila Tata yina kele na Mazulu.” Yinga, tata.

⁴⁸ Ntangu muntu ke kota na ngwisani na Nzambi, yandi zaba ti yandi kele “mbote ve.” Wapi mutindu muntu lendaka kutambula mutindu yayi mpe kukikumisa wapi mutinduu nene yandi kele mpe nionso yina yandi salaka, ntangu yandi kele kima mosi ve? Yandi kele kima ve na kubanda. Kilumbu mosi kuna na

Memphis, na Tennessee, to na . . . Mu banza ti yawu vwandaka na Memphis. Ya vwandaka na mosi ya bisika yina kuna. Mu vwandaka na Mpangi Davis mpe vwandaka na lukutakanu ya reveil. Ya lendaka vwanda na Memphis. Mpe beto vwandaka, beto kwendaka na stade, mpe ba vwandaka na yawu kuna, stade ve, ya vwandaka mutindu musée ya biteki, mpe ba vwandaka na biteki ya nene yina bawu bakaka na bizunga ya mutindu na mutindu ya ntoto, bima ya mutindu na mutindu, yina vwandaka talisa Hercule mpe nionso yina, mpe yina ba-artiste ya nene yemaka. Mpe na yina ba vwandaka talisa kuna kifwani ya bakala mosi ya ba-kilo makumi sambwadi. Beno zaba, wapi ntalu ya yandi? Ba-centime makumi nana na yiya. Yawu yina kaka yandi kele. Ba-centime makumi nana na yiya kele ntalu ya ba-élément chimique nionso beno lendaka kuzwa na kati ya yandi. Yandi kele kaka na mwa ndambu ya miliki ya lupemba samu na kumwangisa yawu na buyamba ya bansunsu, mpe yandi kele kaka na mingi, kaka na mwa ndambu ya calcium, ndambu ya potasse. Nionso ba ke tekisa yawu na ba-centime. Kasi beto ke kebaka kaka ba-centime makumi nana na yiya mpe beto ke bondilaka yawu.

⁴⁹ Kuvwandaka na bana-bakala zole ya kutelama kuna, mpe mosi talaka yankaka, yandi tubaka, “Jim, beto ke na mfunu mingi ve?”

Yandi tubaka, “Ve, beto kele na mfunu ve, Jean.”

⁵⁰ Mu tubaka, “Kasi beno vingila fioti, bana-babakala, beno kele na moyo mosi na kati ya yawu yina kele na ntalu ya bayinza mafunda kumi, yina vwandaka, yina lenda kuvulukuka na ngolo ya Nzambi, kana beno ke ndima yawu kaka.”

⁵¹ Bakala, ntangu yandi ke mona bima yayi, yandi kele na kiyeka ya kutuba na bantu yankaka. Mu monaka yawu ntangu mu vwandaka mwana ya fioti. Mu me lutisa luzingu ya muvimba na yawu. Mu kele na mawa na ntima ti mu kele kaka na luzingu mosi, mu zolaka vwanda na yawu mafunda kumi. Ata ti mu kuzwaka Seko, mu ke zola dyaka kutuba na bantu samu na yawu, samu ti ya kele kima ya kulutila nene yina mu me monaka ntete ve. Kana beno ke tanga na Ezéchiel 33, kapu ya 33 ya Ezéchiel, ya vwandaka na sintidi mosi na zulu ya yinzo-zulu, mpe sintidi yayi vwandaka na kiyeka ya mbanza ya muvimba. Amen. Ntangu yayi, beno vumbuka, beno vumbuka beno mosi na konsiansi ya beno ya kimpeve na mwa ntangu fioti, na yina mu ke baka Disonuku yayi. Sintidi yayi vwandaka bakala yina ba me longusa samu na yawu. Yandi zolaka zaba yina yandi vwandaka sala, samu na kitamina mosi, kaka ntangu bawu vwandaka basika, mbeni vwandaka basika, yandi lendaka mona yandi. Yandi lendaka zaba kutambula, yandi lendaka zaba ntinta ya bawu, yandi lendaka zaba ndonga ya bawu mpe kimvuka ya bawu. Kaka na mutindu meso ya kimuntu lendaka mona, yandi lendaka mona yawu. Mpe ya vwandaka na zulu mingi kulutila

bantu yankaka, samu ba longusaka yandi na kuzaba mbeni. Mpe Nzambi pesaka mbanza ya muvimba na diboko ya yandi. “Sintidi, yinki nge ke tuba samu na mpimpa?” Alleluia!

⁵² Ya kele mutindu basoda ya Nzambi kele bubu yayi. Ba me longusaka bawu na Ndinga. Ntangu kima mosi ke kwisa kuna yina ke monana fioti ya kufwanana na yawu, yina ke talisa kima yankaka na nganda ya Masonuku, bawu ke kebisa dibuundu ya bawu. Kima nionso yina kele ve Biblia, kima nionso yina kele ve—yina kele ve ya Nzambi, mutindu kuvwanda na bamadia ya nkokila yina ba ke pesaka ba-soupe, bamakinu ya nkokila, mpe bima yankaka nionso, samu na kufuta ba-pasteur. Bima yina kele yimbi. Bansaka ya Loto mpe bansaka ya bakalati na kati ya bayinzo-Nzambi, ya kele yimbi! Mpe sintidi ya kieleka na zulu ya kibaka, yina me vwandaka ntete na Mvwandulu ya Nzambi. . . Kana yandi kele ve na zulu ya kibaka ya nene, kana yandi zolaka vwanda kaka na zulu ya kibaka ya nene, kibaka ya nene yayi lendaka vwanda ve ya yinda mingi kulutila dibuundu. Kasi kana yandi kele sintidi ya kieleka, Nzambi ke telemissa yandi na zulu mingi na kati ya ba-sphère ti bantu yankaka lendaka ve kukuma. Kasi yandi ke kebaka mameme, mpe Nzambi ke lomba yawu na yandi! Muntu ya Nzambi yina kele na kati ya Mvwandulu ya Nzambi, mpe yandi zaba ti Nzambi kele Nzambi, mpe zaba ti Nzambi ke zitisaka Ndinga ya Yandi, mpe yina ke tala Nzambi me monisama Yandi mosi mpe ke sala kisalu ya Yandi mpe ke zitisa Ndinga ya Yandi, na yina ata ti ba-organisation to ba-denomination ke meka na kubebisa Yawu, yandi me zaba bantu ya nkonga ya mbeni. Amen. Yandi me zaba yinki kutuba na dibuundu, sintidi ya kieleka.

⁵³ Kana beto me ndima ti Yandi kele, beto vwandaka na Mvwandulu ya Yandi, mpe beto me funguna masumu ya beto, ba me vwanza yawu na buku ya lubambuku ya Yandi. Ya kele ve na muntu mosi kasi Nzambi kaka lendaka sala yawu. Ntangu yayi, beno lendaka sala konso diambu yina na munu, mu ke lemvočila beno, kasi mu ke bambuka moyo na yawu. Kana mu me sala diambu mosi na beno, beno ke lemvočila munu, kasi beno ke bambuka moyo na yawu. Kasi Nzambi lenda lemvočila mpe kuzimbana yawu. Beno banza na yawu, “ke bambuka moyo na yawu ve!” Amen. Yina ke salaka munu mbote. Ntangu diambu yango ke kwisa diaka ve na lubambuku, ya kele kaka Nzambi lendaka sala yawu. Kima yankaka ve kasi Nzambi lenda sala yawu. Yandi tubaka ti Yandi ke katula yawu na buku ya Yandi ya lubambuku. Mu lenda sala yawu ve, beno lenda sala yawu ve, samu beto kele kaka na mwa ba-sense yayi yina kele na nsuka. Kasi Yandi kele ya kukonda nsuka, Nzambi, Yandi lenda kwandi kuzimbana yawu. Amen.

⁵⁴ Mama mosi ya ntwenia katukaka na dibuundu mosi ya banseke, mpe tata ya yandi vwandaka mulongi ya mutindu ya ntama, yina vwandaka boka, to yina vwandaka mambele

ya dibuundu. Mpe na yina yandi kwendaka zinga na kati ya mbanza, mpe yandi vukanaka na bakento yina kuna, mpe yandi bandaka kusala mutindu bawu vwandaka sala, mpe yandi bandaka na kulanda mvwatu ya bawu. Mpe kilumbu mosi yandi vwandaka na nsoni ya nkwizulu ya papa ya yandi mpe mama ya yandi, to tata ya yandi, mu zola tuba, mama ya yandi kufwaka. Na yina bakala yayi ya kiboba, kima mosi kaka yandi vwandaka sala, kele kuvumbuka na suka, kudia madia ya yandi ya suka mpe kubaka Biblia mpe kutanga Yawu, mpe yandi vwandaka kudila mpe kuboka kilumbu ya muvimba, mpe yandi vwandaka kima mbangu na kati ya kivinga, mpe ya vwandaka yangisa fioti mwana ya yandi ya kento. Na yina—na yina ntangu nyonso na kati ya mpimpa, ntangu yandi vwandaka baka Biblia, yandi bandaka na kutanga Yawu, yandi vwandaka vumbuka na mbeto, mpe yandi vwandaka boka, “Nkembo na Nzambi! Alleluia! Oh, nkembo na Nzambi!” Yandi vwandaka lutisa kati-kati ya mpimpa na kubula makulu mpe kuboka.

⁵⁵ Na yina kilumbu mosi yandi zolaka kuyamba bamambebe ya dibuundu ya yandi samu na mwa ndambu ya thé kaka mutindu ba vwandaka sala yawu, beno zaba, na yawu yandi zabaka ve yina yandi ke sala samu na tata ya yandi. Na manima ya nionso, yawu vwandaka papa ya yandi. Na yawu yandi bakaka lukanu ti yandi tulaka yandi na kati ya kibumbulu kuna na zulu, mpe tubaka, “Papa, nge ke zola ve kuvwanda na kisika bakento yayi kele, mutindu yina?”

Yandi tubaka, “Ve, mu ke banza ti mu zola kusala yawu.”

⁵⁶ Yandi tubaka, “Mbote, beto ke kuyamba bakento ya dibuundu na zulu awa bubu yayi, mpe beto ke vwanda na mwa lukutakanu, mwa lukutakanu ya bisambu. Na yawu mu—mu ke tuba na nge, tata, samu na yinki nge lendaka mata ve na kibumbulu?”

Yandi tubaka, “Mu ke kwikila ti mu ke sala yawu.”

⁵⁷ Na yina yandi tubaka, “Tanga buku yayi ya mbote.” Mpe yandi pesaka yandi buku ya géographie. Yandi katulaka Biblia ya yandi ntama ya yandi ti yandi kuvwanda swi. Na yina yandi zabaka ti kana yandi tanga Biblia, na yina, yandi ke sala makelele mingi kuna na zulu. Na yina yandi vwandaka kaka na zulu ya bawu, beno zaba, kisika ba vwandaka sala feti ya bawu. Na yina yandi pesaka yandi buku ya géographie, yandi tubaka, “Yayi kele mbote. Nge fwana tanga yawu, papa, samu ti ya ke tuba na nge kieleka nyonso na yinza.”

“Oh,” yandi tubaka, “Mu ke vwanda na kiese na kutanga yawu.”

⁵⁸ Na yina yandi tubaka, “Ntangu yayi mata kuna mpe vwanda swi tii kuna bakento yayi ke kwenda, mpe na manima mu ke . . . nge ke kwisa kulumuka mpe na yina nge lendaka sala nionso

yina nge me zola kusala.” Yandi ndimaka na kusala yawu. Na yina yandi mataka kuna na zulu, yandi vwandaka kuna na zulu.

⁵⁹ Bawu nionso vwandaka na feti ya bawu ya thé, beno zaba, ba vwandaka kuna ke solula samu na diambu *kingandi*, mpe beno zaba wapi mutindu ya ke vwandaka, ba vwandaka na ntangu mosi ya nene. Mpe kaka pene-pene ya ntangu yina ya vwandaka na kupanzana mosi kuna na zulu, kuboka mpe kudumuka, mpe ba-platre vwandaka kubwa. Bakala yayi ya kiboba vwandaka mata mpe ke kulumuka na kati ya kivinga na mbangu nionso, yandi vwandaka dumuka, mpe yandi vwandaka boka ngolo, “Nkembo na Nzambi! Nkembo na Nzambi!” Bakento yina vwandaka zaba ve yina vwandaka salama kuna na zulu, yina vwandaka kuna na zulu. Na yina na mbala mosi yandi kulumukaka na kikalu, na mbangu nionso yandi lendaka sala yawu.

Yandi tubaka, “Papa, mu me pesa nge buku ya géographie samu na kutanga.”

⁶⁰ Yandi tubaka, “Yinga, mu zaba yawu. Nge zaba,” yandi tubaka, “Mu vwandaka tanga buku yayi ya géographie awa kisika ya kele na bisika na kati ya mubu kele ve na mbandu na kati ya yawu.” Mpe yandi tubaka, “Mu tangaka awa na kati ya Biblia mazono, Yandi tubaka ti Yandi tulaka masumu ya munu na ‘mubu ya nzimbani.’ Nkembo na Nzambi! . . . ? . . .” Yandi tubaka, “Ya ke landila kaka na kukwendaka. Ya kele ve na nsuka, ya ke landila kaka na kukwenda na ntwala.” Ya kele kieleka. Mpe yandi vwandaka boka samu na yina me tala yawu. Mbote, ya kele kieleka.

⁶¹ Nzambi ke tulaka masumu ya beto na kati ya mubu ya nzimbani, yandi ke vwanzaka yawu, mpe ya kele mutindu ya me salamaka ve. Oh, la la! Na yina beto ke telama na lemvo ya Nzambi, na nzila ya Yesu Klisto Mfumu ya beto, ya kuvedila mpe ya santu, ya santu kaka mutindu Yandi vwandaka, samu Yandi ke mona munu ve na ntangu mu ke kwenda kuna, Yandi ke mona Mwana ya Yandi Mosi. Mutindu kaka Yandi lenda mona . . . lenda ve kumona munu, samu ti mu kele na kati ya Mwana ya Yandi. Mpe Yandi ke na kumonaka kaka Mwana ya Yandi. Ya kele mbote ve? Beto ke banza diaka ve masumu, nionso me kwenda, ya kele na nsi ya Menga. Yinga, tata. Beto ke vwanda diaka ve na boma ya yawu, yawu nionso me basika, yawu me basika na mabanza ya Nzambi. Yandi ke bambuka moyo na yawu diaka ve.

⁶² Esaïe, profete yayi ya ngolo, na ntangu yandi fungunaka masumu ya yandi, yandi tubaka, “Kyadi na munu, samu mu kele muntu ya bikoba ya masumu.” Profete! “Mu kele muntu ya bikoba ya masumu, mpe kimvuka ya munu kele ya masumu.” Beno me mona? “Bantu yina mu ke longaka, bawu kele na masumu. Mu kele na masumu. Mpe kyadi na munu. Kasi kuna kwisaka nkonga ya Bawanzio yina kulumukaka na Nkembo ya

Nzambi, yina vwandaka panza matuti, mpe mu ke tala kuna na zulu mpe mu ke mona bansongi ya robe ya Yandi ke fulusa Mazulu ya muvimba. Mpe mu ke talaka Bawanzio yayi yina me zabaka ata fioti ve yina disumu kele. Bawu zaba ata fioti ve yina disumu kele, mpe kuna, na Mvwandulu ya Nzambi, ba vwandaka na mapapu zole samu na kufika bizizi ya bawu, ba vwandaka mapapu zole samu na kufika makulu ya bawu, mpe bawu kele na mapapu zole samu na kupumbuka na yawu, mpe bawu vwandaka boka kilumbu mpe mpimpa, ‘Santu, santu, santu kele Mfumu Nzambi.’” Fiou. Yina ke sala beno kuwa mutindu santu ve, mutindu yina ve? Ntangu yayi, yinki yandi salaka? Yandi tubaka, “Kyadi na munu.”

⁶³ Mpe ntangu yandi fungunaka masumu ya yandi mpe tubaka “kyadi na munu,” Wanzio kwendaka kuna mpe bakaka bapencette, bakaka makala ya tiya yina vwandaka talisa Mpeve-Santu mpe Tiya, mpe yandi kwizaka mpe tulaka yawu na zulu ya bikoba ya profete, mpe tubaka, “Mu me sukula nge.” Na yina na kubulaka mapapu ya bawu mutindu *yayi*, ba vwandaka pusa ba-rido ya ntangu, mpe yandi kuwaka Nzambi kutuba, “Nani ke kwenda samu na Beto?”

⁶⁴ Kasi na manima yandi monaka ti ya vwandaka na mutindu ya kukatula disumu, Nzambi zolaka ti muntu mosi kukwenda samu na Yandi, mpe yandi tubaka, “Munu yandi yayi, fidisa munu.” Yandi vwandaka na Ntwala ya Nzambi, mpe fungunaka masumu ya yandi, mpe yandi sukulaka masumu ya yandi, mpe yandi kubamaka samu na kisalu. Amen.

⁶⁵ Mutindu poète bakulaka yawu, yandi tubaka:

Mafuku ke na kufwa ntangu yayi na disumu
mpe nsoni,
Widikila mawa mpe kudila ya bawu;
Sala nswalu, mpangi-bakala, kwenda nswalu
na lusalusu ya bawu;
Vutula mvutu, “Mulongi, munu yandi yayi.”

⁶⁶ Ntangu mu ke banza na Afrika, Inde, mpe bisika nyonso na yinza, mafuku ya mimpani ke boka mpe ke dila samu na kyadi, mpe nani ke kwenda? Ya kele ve kupesa bawu mwa mukanda ya fioti, kasi kunatila bawu Yesu Klisto. Muntu mosi na Mvwandulu ya Yandi, mutindu Moise, yina lendaka kulumuka kuna mpe kutalisa bawu luvukulu ya kieleka. Ya ke sala ve ti bawu kukota na dibuundu mosi, to kupesa mbote mpe kubaka credo, kasi kunata luvukulu na moyo ya bawu; bakala mosi ya mbote ya busantu. Yinga, Esaie fungunaka masumu ya yandi mpe yandi vedisamaka.

⁶⁷ Na manima Jacob nwanaka mpimpa ya muvimba, na kufungunaka masumu ya yandi, beno ke bambuka moyo kisika yandi vwandaka? Ba bokilaka yawu Peniel, P-e-n-i-t-e-l, Peniel. Mpova yayi *Peniel*, na Hebreux, zola kutuba “kizizi ya Nzambi

ya Ngolo nionso.” Jacob, mwa muntu ya luvunu tinaka ya muvimba...nkumbu ya yandi vwandaka *Jacob*, yina zola kutuba “mukusi,” yina kele muntu ya luvunu, yandi vwandaka tina luzingu ya yandi ya muvimba, ntama na Nzambi, kasi yandi kumaka kilumbu mosi na Mvwandulu ya Nzambi na Peniel, na ntwala ya Nzambi, yandi kangaka Nzambi mpe zolaka ve kuyambula Yandi. Nzambi, beto kele diaka na nsatu ya ba-Jacob. Yandi simbaka mbote na ntwala ya Nzambi, na Mvwandulu ya Nzambi, yandi bikanaka kuna tii na kubasika ya mwini. Nzambi tubaka, “Bika Munu kwenda, samu mwini ke na kubasika.” Mpe yandi vwandaka na ntwala ya Nzambi tii na kubasika ya mwini, kasi yandi katukaka kuna ya kunungisama mpe me vulusa. Huh.

⁶⁸ Oh, yinki diambu yayi ya nene yawu vwandaka, ntangu yayi, kuzaba ti yandi nwanaka tii na nsuka. Ya kele, yandi monaka bidimbu ya Nzambi, yandi vwandaka na bandosi na yina me tala Nzambi, kasi yayi vwandaka kilumbu mosi yandi vwandaka na ntwala ya Nzambi, na Mvwandulu ya Nzambi. Beno banza na yawu, bankundi. Ntangu yayi, mutindu beto ke sala nswalu. Na Mvwandulu ya Nzambi, muntu ke soba. Jacob sobaka. Ntangu yayi yandi lendaka tambula na Nzambi. Yinga, yandi vwandaka muntu ya luswaswanu kulutila yina yandi vwandaka ntete kuna. Bitumba vwandaka diaka me manisa kuna. Yinga, tata. Mpe yandi bandaka na kutunga autel. Yandi vwandaka ve na kikalulu ya kutunga ba-autel, beno zaba. Kasi, mu ke tuba na beno ti, ntangu beno ke kota na Mvwandulu ya Nzambi, beno zola kutunga autel kisika mosi kuna. Beno zola mona kisika yina beno lendaka sambila. Yandi tungaka autel. Yandi sukulamaka, mpe Nzambi nungaka.

⁶⁹ Mpe Jacob sobaka kubanda na *Jacob*, “mukusi” na *Israël*, “mwana-ntinu, ya ngolo na Nzambi.” Yawu yina salamaka na Jacob. Mukusi, muntu ya luvunu, muntu ya kukondwa kusungama, muntu ya kukondwa busantu, muntu ya luvunu, yina vunaka mpangi ya yandi ya bakala, yibaka bukuluntu, mutindu ya vwandaka, na mpangi ya yandi ya bakala, yina yandi kuzwaka na nzila ya yimbi, muntu ya luvunu ya mutindu yayi. Yandi vunaka bokilo ya yandi ya bakala. Yandi tulaka balutangu ya peuplier mpe yawu basisaka bana-bangombe ya batasi-tasi, ntangu bangombe yina vwandaka na kivumu vwandaka kwisa kuna, beno tala yayi, mpe mameme...ba vwandaka mona balutangu yayi mpe bana bangombe ya tasi-tasi, ba vwandaka kubuta bana ya tasi-tasi. Muntu ya luvunu, yandi vunaka bokilo ya yandi. Yandi vunaka mama ya yandi, yandi vunaka tata ya yandi, yandi vunaka mpangi ya yandi ya bakala, kasi ntangu yandi kotaka na...Yandi vwandaka muntu ya luvunu. Yandi vwandaka kukima bisika nionso yandi vwandaka kwenda, ntangu nionso yandi vwandaka kukima ntama na Nzambi, yandi vwandaka kukima mpangi ya yandi ya bakala. Kasi ntangu yandi kotaka na Mvwandulu ya Nzambi, yandi zabaka ti yandi

vwandaka nsumuki. Yinki yandi salaka? Yinki yandi salaka? Yandi kuzwaka ntangu ya mbote ya yandi. Yandi kutanaka na kima yina yandi me banzaka ntete ve, mpe yandi vwandaka kuna tii kuna masumu nionso kwendaka. Oh, la la! Nzambi tulaka yandi na Mvwandulu ya Yandi Mosi.

⁷⁰ Nzambi ke kuzwaka mutindu ya kunata bantu na Mvwandulu ya bawu, kuna ba ke baka lukanu ya bawu. Bayankaka ke kwenda mbangu ntama na Yandi, bayankaka ke kwisaka mbangu na Yandi. Kana ba zabaka bawu samu na Luzingu, ba ke kwikila Yawu, ba ke kangama na Yawu. Kana mutindu yina ve, bawu ke meka kukwenda ntama mpe ba ke tuba, “Ya kele ve na kima mosi samu na Yawu.” Beno me mona? Mpe yayi kele muntu yina me zimbana. “Muntu yina ke funguna disumu ya yandi, yandi ke kuzwa mulemvo. Kana nge ke bumba disumu ya nge, nge ke kwenda na ntwala ve.” Ve.

⁷¹ Na yawu Jacob ntangu yandi, beno zaba, kilumbu yina landaka yandi kutanaka na Esaus mpangi ya yandi ya bakala. Yandi vwandaka ve na nsatu ya lusalusu na yandi kuna. Yandi vwandaka ve na nsatu ya makesa ya yandi. Yandi vwandaka na kisalu ya kutunga ba-autel. Yandi vwandaka diaka ve na boma ya Esaus.

⁷² Psaumes 16:8, David me tuba, “Mu ke tulaka Mfumu na ntwala ya munu.” Ya kele kima ya mbote ya kusala. Psaumes 16:8, “Mu ke tulaka Mfumu na ntwala ya munu.” Na yina, yandi vwandaka ve na mubulu samu na yawu. Yandi zolaka kundima kieleka Mvwandulu ya Yandi, na yina David tubaka, “Mu ke tulaka Mfumu ntangu nionso na ntwala ya kizizi ya munu. Ntangu yayi munu, David, ke talaka Mfumu na ntwala ya kizizi ya munu, ntangu nionso samu na kuzaba kieleka—kieleka Mvwandulu ya Nzambi.” Ya ke vwanda ve dilongi ya mbote samu na beto nionso na nkokila yayi? Kutula Mfumu na ntwala ya kizizi ya beto ti beto ke zaba Mvwandulu ya Yandi. Beno tula Yandi ntete. Samu na yinki? Beno tula Yandi ntete, na ntwala ya beno. Samu na yinki? Na yina beno ke sumuka ve ntangu beno me zaba ti beno kele ntangu nionso na Mvwandulu ya Nzambi. Ntangu beno ke bakula ti Nzambi kele pene-pene, beno tala mbote yina beno ke tuba.

⁷³ Bakala mosi, ntangu yandi ke banza ti Nzambi me kwenda, yandi ke singa, yandi ke kulula bakento, yandi ke sala . . . yandi ke yiba, ke kuyiba, ke tuba luvunu. Yandi ke sala bima nionso ntangu yandi ke banza ti Nzambi ke mona yandi ve. Kasi beno nata yandi na Mvwandulu ya Nzambi, yandi ke sukisa yawu malu-malu yayi. Beno me mona? Mpe David tubaka, “Mu me tula Mfumu ntangu nionso na ntwala ya munu.” Yina ke kima ya mbote. Kuyituka ve ti Nzambi tubaka ti yandi vwandaka muntu landila ntima ya Yandi Mosi. Muntu ke sala nionso ntangu yandi ke banza ti Nzambi kele ve pene-pene. Kasi ntangu yandi me zaba ti Nzambi kele pene-pene, beno me monaka ntete nsumuki?

Ntangu muntu mosi ya santu ke kwisa kuna, yandi ke bika kusinga, kana yandi kele na mwa ndambu ya luzitu. Beno me mona? Yandi ke tuba ve mambu ya mvindu yina yandi zolaka tuba. Beno me mona? Beno me mona, yandi ke bika yawu, samu yandi zaba ti yandi kele na kati ya Mvwandulu ya Nzambi, samu ti Nzambi ke zingaka na kati ya tabernacle ya bantu ya Yandi. Beno me mona?

⁷⁴ Na manima David me sala yayi, yandi tubaka, “Ntima ya munu ke sepela.” Mu ke zola beno kutanga yawu, Psaume 16. “Ntima ya munu ke sepela, mpe nzutu ya munu ke pema na kivuvu.” Samu na yinki? Ntima ya munu ke sepela samu mu ke tulaka Nzambi na ntwala ya munu ntangu nyonso. “Mpe nzutu ya munu ke pema na kivuvu; kana mu kufwa, mu ke vumbuka diaka. Samu ti Yandi ke bika ve Muntu ya Yandi ya Santu kumona kupola, to dyaka Yandi ke bika ve moyo ya Yandi na difelo.” Beno me mona? Na ntangu David tulaka Nzambi na ntwala ya yandi, mpe yandi zabaka ti konso ntangu yandi vwandaka na Mvwandulu ya Nzambi. “Benso sosa ntete Kimfumu ya Nzambi.”

⁷⁵ Ntangu yayi beno kuwa, dibuundu, mu zola beno. Mpe mu zola ti beno kuwa munu ntangu yayi. Mutindu Mpangi McCullough vwandaka tuba, “Mu ke tuba kima mosi.” Ntangu nionso beno tula Mfumu na ntwala ya beno, mpe beno sala kima mosi ve yina beno lendaka ve kusala na Mwandulu ya Yandi, samu ti Yandi ke na kutala beno mbote. Beno me mona? Mfumu ke vwandaka pene ya bayina ke zitisaka Yandi. Yandi ve . . . Yandi ke bikala kaka pene-pene ya beno. Mpe Yandi zaba nionso yina beno ke sala, mpe beno fwana zaba yawu. Ntangu beno ke banda na kutuba luvunu, beno sala yawu ve, beno bambuka moyo, Nzambi ke kuwa beno. Kana beno banda na kuyiba mwa fioti, beno sala yawu ve, Nzambi ke tala beno. Kana beno banda na kubaka Nkumbu ya Yandi na mpamba, beno sala yawu ve, Nzambi ke kuwa beno. Kana beno ke zola kubanda na kunwa dikaya, Yandi ke tala beno. Beno me mona? Yandi . . . Beto vwandaka yimbila nkunga mosi, “Kuna na kati ya nzila na kati-kati ya moyo, ya kele na disu mosi ke tala nge; konso kitambi nge ke tala, disu yayi ya nene ke tala, ya kele na disu mosi ke mona nge.” Beno bambuka moyo, beno sala mutindu David, beno tula Mfumu ntangu nionso na ntwala ya kizizi ya beno. Na yina ntima ya beno ke sepela mpe nzutu ya beno ke pema na kivuvu, samu ti Yandi silaka yawu. Yinga, tata. Yandi zabaka ti yandi ke vumbuka samu ti Nzambi silaka yawu. Mbote mingi.

⁷⁶ Ntangu beto ke kota na Mvwandulu ya Yandi, beto ke soba, beto ke vwanza mutindu mosi ve. Beno tala na kati ya bansungi nionso, babakala, ya bisika nionso. Beno tala Abraham. Beno ke tuba, “Mbote, luzingu ya kusoba kele kaka samu na balongi.” Oh, ve. Luzingu ya kusoba kele samu na muntu nionso. Beno me mona?

⁷⁷ Ntangu yayi, Abraham vwandaka kisadi-bilanga, kasi ntangu yandi kuwaka Ndinga ya Nzambi kuzonza na yandi, mpe monaka vision yina, yandi vwandaka muntu ya kusoba kubanda ntangu yina. Yandi kabwanaka yandi mosi na dikanda ya yandi, na bampangi ya yandi nyonso, mpe yandi tambulaka mutindu kizieti mpe nzenza, na yinsi ya nzenza, luzingu ya yandi ya muvimba, yandi vwandaka zinga na batenta, samu ti yandi tubaka pwelele ti yandi vwandaka sosa mbanza yina Mutungi mpe Musadi vwandaka Nzambi. Yandi zabaka ti ya vwandaka na Nzambi, mpe ya vwandaka na mbanza mosi kisika Yina Mutungi mpe Musadi vwandaka Nzambi. Ya kele yina Hébreux 11 ke tuba na beto, ti yandi vwandaka sosa mbanza yina Mutungi mpe Musadi vwandaka Nzambi. Yandi vwandaka muntu yina me soba, kasi yandi vwandaka kima yankaka ve kasi kaka kisadi-bilanga mosi. Kasi yandi monaka vision mpe kotaka na Mvwandulu ya Nzambi, mpe yandi vwandaka muntu yina me soba kubanda ntangu yina.

⁷⁸ Moïse, yandi vwandaka muvungi, kasi yandi vwandaka muntu yina me soba ntangu yandi kotaka na Mvwandulu ya Nzambi. Yandi vwandaka koyi-koyi, yandi vwandaka kukima Pharaon, na makesa nionso na manima ya yandi. Kasi na nkawa mosi na diboko ya yandi, yandi vutukaka mpe bakaka yinsi ya muvimba. Beno me mona? Samu na yinki? Yandi kotaka na Mvwandulu ya Nzambi. Yandi vwandaka muntu yina me soba, muvungi.

⁷⁹ Pierre, mulobi mbisi, zabaka kima ve samu na yina me tala kuloba . . . to zabaka kima mosi ve samu na Nzambi, kima kaka yina yandi zabaka vwandaka mutindu ya kukanga bambisi. Kasi ntangu yandi kotaka na Mvwandulu ya Nzambi, mpe monaka Mvangi ya nene Yina lendaka vanga mbisi, ntangu Yandi tubaka na yandi na kulosa ba-filet samu na kuloba. Ya vwandaka na mbisi mosi ve kuna, yandi bendaka kaka ba-filet ya yandi. Kasi yandi tubaka, “Na Ndinga ya Nge, Mfumu. Mu ke kwikila ti Nge kele Mwana ya Nzambi, mpe kana Nge bika . . . kana mu losa filet, Nge me tuba na munu na kusala yawu; na Ndinga ya Nge, samu ti Nge mpe Ndinga ya Nge kele mosi, mu me losa filet.” Mpe ntangu yandi bandaka na kubenda, yandi tubaka, “Kwenda, Mfumu, mu kele muntu ya masumu.” Beno me mona, mulobi mbisi, na manima Pierre kutanaka na Klisto yandi vwandaka diaka ve mutindu mosi. Yandi, na yina, vwandaka ya kieleka mingi na Nzambi, ba pesaka yandi bafungula ya Kimfumu. Yinga, tata.

⁸⁰ Paul, Pharisien ya lukumu, ya mayele mpe yina me longukaka nsambulu nionso ya . . . ya yinza ya ntangu yina, mosi ya bantu ya kulutila mayele na yinsi. Kasi ntangu yandi kwisaka na ntwala ya Dikunzi ya Tiya kilumbu mosi, Nzambi yina yandi vwandaka talisa mpasi, kukondwa kuzaba. Yandi vwandaka Pharisien, yandi vwandaka kwikila ve ti Nzambi vwandaka

Muntu. Yandi zabaka ti Nzambi vwandaka Dikunzi ya Tiya, Yawu twadisaka bantu ya Yandi na Egypte, Yawu vwandaka na bawu ntangu nionso. Kasi ntangu yandi monaka Dikunzi yayi ya Tiya, yandi kubwaka na kizizi ya yandi. Mpe yandi kuwaka Ndinga kutuba, “Saul, samu na yinki nge ke talisa Munu mpasi?”

Yandi tubaka, “Nge kele nani, Mfumu?”

Yandi tubaka, “Mu kele Yesu.”

⁸¹ Yandi vwandaka muntu, yina tubaka, “Wapi mutindu ba botikaka beno?” Yandi vwandaka na Mvwandulu ya Nzambi. Yandi vwandaka muntu yina me soba kubanda kuna, yandi vwandaka na Mvwandulu ya Nzambi. Yawu ke sobaka muntu.

⁸² Charles G. Finney, muntu ya misiku, muntu ya musiku ya nene ya Philadelphie, kasi ntangu yandi kotaka na Mvwandulu ya Nzambi yandi yambulaka malongi ya yandi ya musiku mpe kukuma mulongi ya kulutula nene yinsi yayi me kuzwaka ntete ve.

[Kisika ya mpamba na bande—Mu]. . . vwandaka mulongi, samu kilumbu mosi yandi kotaka na Mvwandulu ya Nzambi. Yandi banzaka, kilumbu mosi, yandi ke longuka samu na ministere. Beno zaba buku ya yandi. Yandi kele na disolo ya luzingu ya yandi mosi. Yandi kwendaka kuna samu na kusambila. Yandi banzaka ti yandi vwandaka mulongi. Yandi vwandaka na nsatu, ti yandi zolaka kulonga, mpe yandi vwandaka na mwa malongi yina yandi ke meka na kulonga. Yandi kwendaka kilumbu mosi, na bureau ya yandi, samu na kusambila, mpe kwendaka na kati ya mfinda. Yandi fukamaka na manima ya yinti mosi ya nene kubwaka na mupepe, kisika yina yandi vwandaka kwenda kusambila na manima ya midi nionso. Musambidi ya nene, kasi yandi vwandaka kwikila na Yawu ve.

Ya vwandaka na bakento zole na kati ya dibuundu, yina vwandaka tuba ntangu nionso, “Tata Finney, beto ke sambila ti nge ke kuzwa Mpeve-Santu.”

Yandi tubaka, “Mu kele na Mpeve-Santu.” Yandi tubaka, “Mu kele mulongi.”

⁸³ Bawu vwandaka tuba, “Tata Finney, nge kele muntu ya nene, mpe nge me zaba mbote Ndinga, kasi nge kele na nsatu ya Mpeve-Santu. Beto ke sambila samu na nge.” Mwa bakento ya lutondo.

⁸⁴ Na yawu yandi landilaka, landilaka mutindu yayi. Na yawu konso kilumbu yandi vwandaka basika na bureau ya yandi, mfumu ya yandi mpe bantu nionso kuna yandi vwandaka sala kosalu, mpe yandi vwandaka basika na bureau ya yandi ya misiku mpe vwandaka kwenda kuna samu na kusambila. Mpe kilumbu mosi yandi vwandaka sambila kuna mpe yandi

kuwaka kubukana ya lutangu mosi. Yandi banzaka ti mfumu ya yandi ya kisalu vwandaka kwisa kuna, samu na kusosa yandi. Yandi vumbukaka na nswalu nionso. Yandi tubaka, “Mfumu Nzambi, mu ke kwikilaka na Nge.” Mpe mwa lutangu mosi me bukana, yandi vwandaka sala, “Uhm! Uhm! Uhm!” yandi vumbukaka mpe tubaka, yandi talaka pene-pene, yandi talaka yina vwandaka buka lutangu. Mpe ya vwandaka na ntangu yina yandi kotaka na Mvwandulu ya Nzambi. Yandi zabaka ti lutangu yina me bukana na lukanu mosi. Yandi telemaka kuna, masa ya meso vwandaka kulumuka na matama ya yandi. Yandi tubaka, “Ya lendaka vwanda ti bakento yina kele ya kusungama. Mu ke na nsoni ti muntu mosi kumona munu ke tuba na Nzambi ya munu, kasi mu ke banza ti ya vwandaka lukumu ti muntu kumona munu kuzonza na mfumu ya munu ya kisalu. Wapi mutindu Mfumu ya munu kele nene mingi kulutula mfumu ya munu ya kisalu!” Yandi tubaka, “Mfumu, lemvokila munu mpe fulusa munu na Mpeve-Santu,” yandi bandaka na kuboka mpe kuboka ngolo. Yandi vwandaka na Mvwandulu ya Nzambi. Yandi vutukaka mbangu na bureau ya yandi na kati ya mbanza. Yandi bandaka na kuboka ngolo mingi ti yandi kwendaka na manima ya kielo, yandi tubaka, “Mfumu, mu me nata nsoni na zulu ya Nge. Bumba munu awa tii kuna yawu ke luta munu.” Samu na yinki? Yandi kotaka na Mvwandulu ya Nzambi. Yandi vwandaka muntu yina me soba. Malongi yina yandi vwandaka longi, yandi longi bawu malongi ya mutindu mosi mpe mioyo kwizaka na autel. Beno me mona, yandi vwandaka na Mvwandulu ya Nzambi.

⁸⁵ Moody, mwa cordonier ya kiboba, yina vwandaka zaba na mpasi ABC ya yandi. Ya kieleka. Grammaire ya yandi vwandaka ya nsi mingi. Muntu mosi tubaka na yandi kilumbu mosi, “Grammaire ya nge kele ya nsi mingi, Tata Moody.”

Yandi tubaka, “Kasi mu ke nungaka mioyo na yawu.” Na yina . . .

⁸⁶ Kilumbu mosi bazulunale, musoniki ya mbuta zolaka sonika kima mosi na zulunale. Yandi kwendaka kuna samu na kutala wapi mutindu bakala yayi vwandaka sala samu na kukanga bakonga ya bantu yayi mutindu yayi, mwa muntu mosi ya fioti, na dibandi, mpe nionso yina, mpe mandefu vwandaka kulumuka na nsi mingi, mutindu na kivumu ya nene, mpe yandi vwandaka muntu ya boma na kutala. Na yina zulunale yayi kieleka vwandaka sawula yandi, ya vwandaka tuba, “Mu ke na mona ve na yinza yina muntu mosi lendaka mona na kati ya Dwight Moody.” Yandi tubaka, “Yandi kele kitoko ve, ndinga ya yandi kele ya kukangama, yandi kele na mandefu yina ke kulumuka tii na luketo ya yandi, yandi kele na dibandi mutindu citrouille.” Mpe yandi tubaka, “Wapi mutindu muntu mosi na yinza lendaka kwenda kumona kima mosi na kati ya Moody?”

⁸⁷ Na yina ntwadisi ya ba-campagne ya Moody kumonaka yawu, tubaka, “Tala, Tata Moody, mu ke tanga yayi samu na nge.” Moody lendaka ve kutanga yawu yandi mosi. Na yina yandi tubaka, “Mu ke tangila nge zulunale yayi.” Mpe yandi sonikaka yawu.

⁸⁸ Moody zangulaka kaka mapeka ya yandi, yandi tubaka, “Ya kieleka ve, bawu ke kwisaka kumona Klisto.” Yawu yina kaka. Samu na yinki? Yandi vwandaka na Mvwandulu ya Nzambi. Yandi vwandaka sala ba-semelle ya basapatu, yina zolaka kubeba na bantu; yandi lwatisaka bantu Nsangu ya mbote ya kukubama. Samu na yinki? Yandi vwandaka na Mvwandulu ya Nzambi. Ya kieleka.

⁸⁹ Kento mosi ya leke kotaka na Mvwandulu ya Nzambi, ya kubwa kaka mutindu yandi lendaka vwanda. Na ntangu yandi bakulaka ti yandi vwandaka na Mvwandulu ya Nzambi, masumu nionso lemvukaka mpe yandi vwandaka ya kuvedila mpe mpembe mutindu fololo lis. Oh, la la. Mu lendaka tanga diaka bantu yankaka awa, kasi ntangu ke pesa munu ve muswa.

⁹⁰ Kasi mu ke zola kutuba fioti samu na munu mosi. Ba lendaka kuzwa muntu ya mpasi mingi kulutila munu? Mu vwandaka wapi? Mu me basika na dibuta mosi ya binwa-malafu, mu me basika na dibuta mosi ya bateki ya yimbi ya malafu. Mpe beno zaba yawu, mosi na mosi ya beno kuzaba yawu, beno zaba mutindu ya nkumbu yina beto vwandaka na yawu awa. Bantu vwandaka ve kuzonza na beto na bala-bala. Ntangu mu vwandaka kwenda na mbanza, ntangu mu ke banda na kutuba na muntu mosi, muntu mosi ve lendaka tuba na munu ti muntu mosi ve vwandaka pene-pene ya munu. Ba vwandaka solula na munu, kana muntu yankaka me kwisa, ba vwandaka bika munu kuna. Mpe mu vwandaka telema kuna mpe kudila, “Ve, mutindu yayi ve, ya lendaka salama ve. Yayi kele yimbi.”

⁹¹ Kasi kilumbu mosi mu kotaka na Mvwandulu ya Nzambi. Yandi sobaka munu mpe salaka munu mwana ya mutindu yankaka. Lemvo ya Yandi nataka munu na Mvwandulu ya Yandi. Mu ke zolaka ve kubika Yawu. Bamvula makumi tatu mu ke vwandaka kuna. Mu ke zola ve kubika Yawu. Mu kele na kivuvu ti mu ke vwanda ntangu nyonso Kuna. Ata ti lufwa yawu mosi ke kabula munu ve na Mvwandulu ya Yandi. Ve. Mu ke vwanda na Yandi kukondwa nsuka. Ntangu mu monaka Mvwandulu ya Yandi na mbala ya ntete, mu bokaka mutindu Esaie, “Kyadi na munu.” Na yina Yandi simbaka munu na lemvo ya Yandi. Mu vwandaka muntu ya kusoba. Mwa kimpumbulu yina vwandaka basika mpe vwandaka sala nionso, me kusoba, mpe kubanda ntangu yina mu me kumaka mwana ya Yandi. Kubanda ntangu yina, mu ke zolaka kupesa luzingu ya munu ya muvimba samu na kusalu ya Yandi, kana mu zolaka vwanda diaka na baluzingu mafunda kumi samu na kupesa Yandi. Yayi me kuma kaka ya

ntama ntangu yayi, bamvula makumi tanu na tatu me luta. Pene ya bamvula makumi tatu na tatu na kati ya bawu, to bamvula makumi tatu na zole vwandaka samu na Nsangu ya mbote. Mu ke zola kuvwanda diaka na mvula fundu mosi mu lendaka kupesa. Samu na yinki? Ntangu mu kotaka kilumbu mosi na Mvwandulu ya Yandi mpe bakulaka ti ya vwandaka na Muntu mosi Yina vwandaka zola yina ba lendaka kuzola ve, ya vwandaka na Muntu mosi vwandaka zola munu ntangu ata muntu mosi ve lendaka kuzola munu, ya vwandaka na Muntu mosi Yina vwandaka kipe munu ntangu ata muntu mosi ve vwandaka kukiye munu. Mu tulaka maboko ya munu pene-pene ya kulunsi ya Yandi, mu yambaka yawu, mpe munu na Yandi kumaka mosi na ntangu yina. Mpe kubanda ntangu yina mu ke zolaka Yandi. Yandi tulaka tasi na ntulu ya munu mpe ntima ya munu na Menga ya Yandi, na kusimbaka munu mpe kulemvokilaka masumu ya munu, mpe mu ke na kiese na nkokila yayi na kuvwanda mosi ya Yandi. Mu ke zolaka ata fioti ve kubasika na kisika yayi ya Mazulu, ata ti muyunsi ke meka na kundimisa munu; kasi mu kele na lukengolo na kati ya tenta ya Nzambi, mpe zola ya Yandi mpe lemvo ya Yandi ke pesaka munu kiese, mpe mu ke zingaka na simu alleluia. Oh! Ya ke sala ti ntima ya munu kusepela.

⁹² Mu ke tuma Yandi na muntu nionso ya kulemba. Mu ke tuma Yandi na beno yina kele na kivuvu mosi ve. Beno yina me vwandaka ata fioti ve na Mvwandulu ya Yandi, kima mosi kaka beno lendaka sala kele kundima masumu ya beno mpe kuzaba ti beno kele na yimbi, mpe na nkokila yayi Nzambi me tuma Wanzio, yina ba ke bokila Mpeve-Santu, yina ke katula masumu ya beno nionso. Na yina beno ke boka, “Mfumum, munu yayi, fidisa munu.” Na yina beno ke telemisa maboko ya beno mpe beno yimba, “Mu ke kumisa Yandi! Mu ke kumisa Yandi! Beno kumisa Mwana-dimeme yina kufwaka samu na misumuki. Beno pesa Yandi nkembo, beno nionso, samu Menga ya Yandi me sukula matono nionso.” Mu zola Yandi. Beno ve? Kuzinga na Mvwandulu ya Yandi!

⁹³ Ntangu mu me mata na chaire awa na suka yayi, mu vwandaka kieleka mbote ve mpe vwandaka ya kubela mingi samu. . . Mu—mu vwandaka na Kentucky na sabala me luta na bankundi ya munu mosi yina kele ya kuvwanda awa. Kana mu vwandaka mingi kuna, ba zolaka kufwa munu, ba zolaka kusala yawu, na lutondo, mwa bamama ya kinkuku yina mu me zabaka ve na luzingu ya munu. Mpe ntangu mu me fuluka, mu ke fuluka kulutila mingi, “Mpangi Branham, nge ke na nsatu ya mwa ndambu ya yayi?” Mpe ya kele mbote mingi, ti mu ke meka na kukulumusa yawu na ngolo. Mu ke fuluka mingi ti mu lendaka ve kutambula. Mu—mu lendaka ve kulala, mpe mu ke vumbuka mpe mu ke tambula fioti kuna. Mpe mu vwandaka kuwa mbote ve na ntangu mu kumaka awa na suka yayi. Kasi ntangu mu me

kota na Mvwandulu ya Yandi, mambu nionso me soba. Mambu nionso me soba, nionso me zimbana na ntangu yina. Ya kieleka. Oh, samu na kuzinga na Mvwandulu ya Yandi!

Mu ke kumisa Yandi, mu ke kumisa Yandi,
Benó kumisa Mwana-dimeme yina kufwaka
samu na bansumuki;
Benó pesa Yandi nkembo benó bantu nyonso,
Samu Menga ya Yandi me sukula matono
nionso.

Beto kulumusa bayintu ya beto ntangu yayi.

[Mpangi Branham ke na kuyimba *Mu Ke Kumisa Yandi—Mu.*]

Samu ti Yandi me sala mingi samu na munu;
Yandi me lemvočila munu yimbi;
Mpe Menga ya Yandi me sukula masumu ya
munu.

Mu ke kumisa Yandi, mu ke kumisa Yandi,
Benó kumisa Mwana-dimeme yina kufwaka
samu na bansumuki;
Benó pesa Yandi nkembo benó bantu nyonso,
Samu Menga ya Yandi me sukula matono
nionso.

[Mpangi Branham ke na kuyimba *Mu Ke Kumisa Yandi—Mu.*]

⁹⁴ Ntangu yayi kana beno kele awa na nkokila yayi. . . Mpe mu zaba ti Mvwandulu ya Yandi kele awa. Mu vwandaka na kati kuna na mwa ntangu fyoti me luta, na mwana mosi ya fioti ya kento ya Dibuundu ya Nzambi, Mpeve-Santu kwisaka na zulu ya munu ntangu mu vwandaka sambila samu na mwana yina ya fioti. Bibuti ya yandi kulumukaka na camping ya Dibuundu ya Nzambi ya Anderson. Mpe mukengi yina kuna, vwandaka zaba ti mwana yina ya kento, badokotolo tubaka ti “yandi lendaka. . . yandi ke kufwa kaka ntama ve, na leucemie.” Mwana-kento yayi ya fioti, ya lutondo, yandi kumaka na bantangu ya yandi ya nsuka. Yandi kwisaka kuna na manima mpe yandi tandaka mwa diboko ya yandi na munu, ya vwandaka ya kuvimba, na bantunga mpe nionso yina ba tobolaka yandi, mpe ya kumaka bleu. Mu talaka yandi, mu monaka vision. Bibuti ya yandi vwandaka me tanga buku mosi kuna. Bawu vwandaka zaba kima mosi ve samu na yawu. Surveillant général tubaka na bawu, yandi tubaka ti ba fwana kunata mwana awa. Ba zolaka kuvutuka na ntangu beto vwandaka sala kisalu ya kubeluka. Mpe mu tubaka, “Benó nata yandi na ntangu yayi,” mu vwandaka ya kutwadisama.

⁹⁵ Ntangu mu vwandaka ya kutelama kuna na kati, Mpeve-Santu vutukaka mpe basisaka disolo ya mwana yango. Tubaka mutindu ya me salama, yina bawu salaka. Yandi tubaka ti

dibanza ya mwana-kento, vwandaka ti yandi zolaka vwanda pianiste. Mpe mama yina vwandaka dila ngolo. Mpe tata yina tubaka, “Ya kele kieleka ya Nzambi.” ba kele kuna na kati ya ditoma na ntangu yayi ke widikila yawu, ba lendaka ve kukota, bawu me kuvwanda kuna ke widikila yawu na ntangu yayi.

⁹⁶ Kuna kwizaka vwale mosi ya nene ya kivudi yina vwandaka diembela na zulu ya mwana. Mpe mu tubaka, “Satana, nge me kuzwa lubelu.” “Nge ke swasikisaka bantu ve, Nzambi. Mpe na ngolo ya mvumbukulu ya Nge, mpe mutindu kisadi ya Nge, mu ke basisa diabulu na mwana yayi.” Nsemo mosi ya nene yina ke ngenga na zulu ya yandi, yawu me suka. Amen. Huh? Kieleka, Yandi kele ya kulunga samu na lukumu nionso!

⁹⁷ Yandi zaba bima nionso. Yandi zaba ntima ya beno. Mpe beno zaba yina beno ke banza; Yandi me zaba, mpe. Kana ya kele na disumu mosi na zulu ya beno na nkokila yayi, mpe beno ke zola ve kukota na Mvwandulu ya Nzambi na yawu na zulu ya beno, beno lendaka telemisa diaka diboko ya beno mpe kutuba, “Mpangi Branham, sambila samu na munu, mu zola vwanda na Mvwandulu ya Yandi na Kilumbu yina, ya kukondwa kizitu.” Nzambi sakumuna beno. Maboko mingi, Nzambi ke mona yawu. Na Mvwandulu ya Yandi. Ntangu yayi mu ke tuba na beno yina beno ke sala. Ntangu yayi beno kuwa kaka mbote. Beno sala mutindu David salaka, beno tula Mfumu na ntwala ya beno malu-malu yayi. Beno tula Mfumu kati-kati ya beno mpe disumu yina, konso disumu yina ke kangama beno na mpusu. Ya lendaka vwanda luvunu, ya lendaka vwanda kuyiba, ya lendaka vwanda mabanza ya yimbi, ya lendaka vwanda kudasuka, ya lendaka vwanda kunwa malafu, ya lendaka vwanda kunwa makaya, ya lendaka vwanda bansaka ya mbongo. Mu zaba ve yinki. Ya lendaka vwanda kulula. Ya lendaka vwanda kima mosi. Mu zaba ve yina yawu kele. Nionso yina ya kele, beno tula Mfumu na ntwala ya beno. Mpe na yina ntima ya beno ke sepela, mpe nzutu ya beno ke pema na kivuvu, samu beno zaba ti Klisto silaka ti Yandi ke vumbuka diaka na bilumbu ya nsuka. Ntangu Yandi ke monika, beto ke fwanana na Yandi. Beno zola sala yawu ve ntangu yayi, na yina beto ke sambila?

⁹⁸ Tata ya beto ya Mazulu, mwa Nsangu mosi ya fioti ya bitini yina me longama na kisadi ya nge ya kulemba. Kasi mu vwandaka banza kaka na dilongi ya “kuzinga na kati ya Mvwandulu ya Nzambi.” Mpe beto ke mona na nkokila yayi kisalu yina ya me sala na zulu ya bantu ya santu na kukota na Mvwandulu ya Nge, yinki kisalu yawu salaka na zulu ya bawu. Bantu ya ndwenga, baprofete ya nene ya ngolo yina me tumama na Nzambi, mpe ba tumaka samu na kulonga Ndinga, mpe kasi ntangu bawu kutanaka na Yandi mbunzu na mbunzu mpe bawu kubwaka na ntoto mutindu bantu ya kufwa. Yinki beto ke sala na kilumbu yina, Mfumu? Beto vwandaka banza na yawu. Beto vwandaka banza na yawu. Mwa maboko makumi

yiya to makumi tanu vwandaka banza yawu, Mfumu, samu ti bawu me telemisa kaka maboko ya bawu, to bantima yina kele na manima ya maboko yayi, vwandaka banza na kukutana na Yandi kubanda beto vwandaka kutuba. Yinki bawu zolaka sala kana bawu zolaka kukutana na Yandi?

⁹⁹ Maboko ya munu, Mfumu, kele na zulu. Yinki mu ke sala? Ntangu yayi, Tata, mu ke salaka bima mingi ya yimbi. Mu ke funguna masumu ya munu na suka yayi na ntwala ya dibuundu, mutindu mu fungunaka yawu na Nge na zulu ya mongo na suka yina ntangu mupepe vwandaka bula mpe ya vwandaka na mvula-mpembe, mpe kuna na zulu ya mongo, mutindu mu bokaka mpe lombaka Nge na kulemvokila munu samu na buzoba ya munu. Mpe mutindu mu zolaka kwisa na ntwala ya bampangi ya munu, yina bayankaka na kati ya bawu ke ndimaka munu mutindu kisadi-profete ya Nge. Mpe, Mfumu, mutindu mu vwanda zola ve kukwiza na ntwala ya bawu mpe kutuba na bawu diambu ya buzoba ti mu me sala kima mutindu yina, kasi, Nzambi, ya kele mbote samu na moyo ya munu ti mu me funguna masumu ya munu mpe mu me bumba yawu ve. Na yina samu na kuvwanda ya kusungama na Nge, mpe ya kieleka na ntwala ya bantu, mu me funguna yawu, Mfumu. Mu me sala yimbi, mu kele ya muvimba na yimbi. Mu ke lomba mulemvo.

¹⁰⁰ Mpe na yina, Tata, mu vwandaka malembe na kusala mambu ya Nge, malembe na kusadila Nge, bambala mingi mu banza ti mu zolaka kwenda ntama mingi kasi mu salaka yawu ve. Tata, mu ke funguna masumu ya munu. Mu zola ti Wanzio ya Nzambi kusukula munu na yawu, na Menga ya Yesu. Maboko yankaka kele na zulu na nkokila yayi, bayankaka na kati ya bawu mu banza me lombaka ata fioti ve lemvo na ntwala; kasi mu ke ndima diambu yayi, kana beto fungana masumu ya beto, Nzambi ke vwanza yawu, Yandi ke tula yawu na mubu ya nzimbani mpe Yandi ke bambuka moyo na yawu ata fioti—ata fioti diaka ve. Mpe, Tata, mutindu mu ke funguna ya munu, samu mu me sala yimbi na ntwala ya bantu yayi, mu me sala ve mutindu kisadi ya Klisto. Ve. Mu vwandaka na boma ti bakala yayi kudasukila munu mpe na kubanzaka ti mu zolaka ve kuniongisa yandi, kasi mu banzaka ve na yina mu vwandaka sala na Nge, Mfumu. Mpe ntangu yayi mu—mu ke sambila ti Nge ke lemvokila munu. Mpe ntangu yayi, Tata, mu zaba ti kana mu me lomba lemvo mu ke kuzwa lemvo, mpe Nge me tula yawu na mubu ya nzimbani, mpe Nge ke bambuka dyaka moyo na yawu ve. Nzambi, mu ke vutula matondo samu na yawu.

¹⁰¹ Mpe mu ke sambila ti Nge kubika konso muntu awa, yina kele na disumu, yina ke bumba disumu ya kima mosi na ntwala ya bawu, bika ti bawu kukatula yawu mpe kutula Mfumu na ntwala ya bawu mutindu David salaka. Samu ntangu yayi beto ke boka, “Kyadi na munu, samu ti mu me mona Nkembo ya Nzambi. Mu kele muntu ya bikoba ya masumu, to kento to

mwana-kento ya bikoba ya masumu, mwana-bakala, to kima mosi.” Nionso yina beto lendaka vwanda, beto kele na masumu, mpe beto ke lomba Menga ya Yesu Klisto, Munkayulu ya kieleka, samu na kusukula beto na masumu nionso, ti beto lendaka zinga na Mvwandulu ya Yandi. Bika ti beto katuka awa na nkokila yayi na bantima ke sepela, mpe nzutu ya beto kupema na kivuvu, na kuzabaka yayi, ti ntangu Yesu ke kwisa, beto ke vumbuka na Yandi na kifwanukusu ya Yandi, mpe beto ke kutana na Yandi na mupepe, na Enlevement, ntangu kutanga ya manima-nima ke nsuka. Beto ke mona ti ba me tanga nsungi ya sambwadi ya dibuundu, mpe beto me kubama ntangu yayi na kukwenda. Beto ke sambila, Nzambi, ti Nge, ntete Nge kangisa kielo, kana ya kele na mosi awa yina me kota ntete ve, bika ti bawu kwisa na mbangu nionso, samu beto banza ti kielo ya mawa, kati-kati mawa mpe lufundusu, ke kangama. Bayina ke ndima mawa ke kota. Bayina ke kota ve bawu ke luta na lufundusu. Nzambi ke kanga kielo. Bika ti kielo kuvwanda ve ya kukanga na nkokila yayi samu na bansumuki yayi nionso me funguna masumu ya bawu. Bika ti beto nionso kuzwa lemvo mpe mawa. Na Nkumbu ya Yesu Klisto.

¹⁰² Mpe ntangu yayi, Tata, samu na bambevo mpe bantu ya mpasi, samu na bayina kele na nsatu, Mu ke sambila ti lemvo ya Nge ke pesa nionso yina bawu ke na yawu nsatu. Bika bawu kota na kati ya Klisto, samu na kukota na Mvwandulu ya Yandi. Kutula Klisto, Klisto, nsilulu, “‘Yandi lwalaka samu na masumu ya munu,’ ya kele masumu ya munu. ‘Na bamputa ya Yandi mu me beluka,’ na yina mu ke tula Mfumu na ntwala ya kimbevo ya munu. ‘Yandi kele na diboko ya munu ya kibakala, mpe mu ke ningana ve,’ mu ke kwenda na kivuvu, na kuzabaka ti mu me beluka. ‘Na bamputa ya Yandi mu me beluka.’” Pesa yawu, Mfumu, na mosi na mosi ya bawu. Mpe beto zaba ti kana beto ke funguna bantima ya beto mpe, to na bikoba ya beto, mpe beto ke kwikila na bantima ya beto, na yina beto ke kuzwa nsatu ya beto.

¹⁰³ Nge tubaka, “Ntangu beno ke tuba kima mosi, beno kwikila ti yawu ke salama, beno ke kuzwa yina beno me tuba.” Beto ke kwikila yawu, Tata, mpe beto ke kwikila ti Nge ke sukula beto na masumu ya beto nionso, mpe ke belusa bimbevo ya beto nionso, mpe pesa beto lemvo, Mfumu, samu na kusadila Nge.

¹⁰⁴ Vwanda na bantu yayi. Mingi na kati ya bawu ke landa banzila ya mudidi na nkokila yayi. Mingi na kati ya bawu ke sala nzietolo ya ba-kilometre mingi. Kubika ve kima mosi kusalama na bawu, Mfumu. Bawu me katuka na bizunga nionso ya yinsi samu na kuvwanda awa na kuwa kutanga ya manima-nima, samu na kumona mutindu beto kele pene-pene na ntangu ya nsuka. Ntangu yayi mu me lomba bawu na kukwenda, na kutulaka Nzambi na ntwala ya bawu, na ntwala ya konso kima yina. Na ntwala ya nzietolo ya bawu, na ntwala ya kusala konso kima yina, na ntwala . . . na ntwala ya kuvumbuka ya bawu, na

manima ya kulala ya bawu, ntangu nionso na ntwala bawu ke lala, konso kisika yina ya kele, beno tula Nzambi ntete! “Samu ti Yandi kele na diboko ya munu ya kibakala, mpe mu ke ningana ve.” Na yina bantima ya bawu ke sepela, samu na kuzabaka ti bawu me kuzwa yina ba lombaka, samu ti Nzambi silaka yawu, mpe nzutu ya bawu ke pema na kivuvu. Pesa yawu, Mfumu, samu beto ke lomba yawu na Nkumbu ya Yesu Klisto. Amen.

Mu ke kumisa Yandi, mu ke kumisa Yandi,
Beno kumisa Mwana-dimeme yina kufwaka
samu na bansumuki;
Beno pesa Yandi nkembo beno nyonso bantu,
Samu Menga ya Yandi me sukula matono
nyonso.

¹⁰⁵ Ntangu yayi beno ke kwikila ti beno me tula Mfumu na kati-kati ya beno na disumu ya beno, kati-kati ya beno na kimbevo ya beno, kati-kati ya beno na yimbi ya beno, kati-kati ya beno mpe banzila ya beno? “Mfumu ke vwandaka ntangu nionso na ntwala ya munu, mpe mu kele na Mvwandulu ya Yandi. Na ntangu ke kwisa mu ke zola kupelisa dikaya, Mfumu kele na ntwala ya munu. Ntangu ke kwisa ntangu mu ke zola kupelisa dikaya, Mfumu kele na ntwala ya munu. Ntangu ke kwisa mu ke banda na kutuba kima ya yimbi, Mfumu kele na ntwala ya munu. Ntangu ke kwisa mu ke banda na kutuba kima ya yimbi, Mfumu kele na ntwala ya munu. Mpe mu ke ningana ve. Amen. Mu ke zinga na Mvwandulu ya Yandi konso kilumbu, na kuvwanda ya munu na bantu, konso kilumbu na masolo ya munu. Mu ke tambula mutindu ti Mfumu kele na ntwala ya munu, samu ti na nkokila yayi mu me tula Yandi na ntwala ya munu. Mu ke ningana ve.” Beno zola Yandi?

¹⁰⁶ Ntangu yayi, beto telama ntangu yayi. Oh, mu ke kuwa kaka mbote. Mu ke kuwa mutindu ti mu ke na nsatu ve ya kuvutuka na yinzo. Mpe beno zaba ti ya kele kaka na kutala baminuti makumi zole na tanu tii ngunga yivwa, mu ke na kutala bangunga zole na suka. Mutindu yina ve? Oh, la la! Kasi ntangu yayi na yina beto ke kwenda, beto bambuka moyo, beto fwana baka Nkumbu ya Yesu na beto, mutindu kinwaninu ya ngolo. Mpe ntangu bakumekama ke kwisa beto. . . kumeka kunata beto na kubambuka moyo ti, niunguta kaka Nkumbu yina ya santu na kisambu.

Baka Nkumbu ya Yesu na nge,
Nge mwana ya mawa mpe ya kiadi;
Yawu ke pesaka nsayi,
Oh, beno baka Yawu bisika nyonso beno ke
kwenda.

Nkumbu ya Ntalu, (Nkumbu ya ntalu!) O
Nkumbu ya kitoko!
Kivuvu ya ntoto mpe kyese ya Mazulu;

Nkumbu ya ntalu, (Nkumbu ya Ntalu!) O
 Nkumbu kitoko!
 Kivuvu ya ntoto mpe kyese ya Mazulu.

¹⁰⁷ Bantu yikwa ke sepelaka na pasteur ya beto, Mpangi Neville? [Dibuundu me tuba, "Amen."—Mu.] Beno ke vutula matondo ve na Mfumu samu na muntu ya mbote, ya kieleka, ya konso kilumbu, yina ke kwikilaka Nsangu ya mbote? ["Amen."] Mpe yandi ke salaka kisalu ya kitoko na kutumamaka na Misiku ya Nzambi, mpe ke longi Ndinga mpe ke keba atimosifere yayi ya nene na kati ya dibuundu ntangu nionso. Beno bambuka moyo, mu kulumukaka na Côte Est, mu kwendaka na Sud, mpe kuna na zulu ya Côte Ouest, mpe mu lutaka na Canada, mpe mu me kutanaka ve na dibuundu yina kele ya kimpeve mutindu dibuundu yayi awa. Bawu me kubwa na nsi mingi, yinga, to bawu me kubwa na bufanatiki, to bawu me kota na mpasi ya mutindu na mutindu, to ba me kuma madidi mingi ti ba lendaka ve kuningana. Yawu yina.

¹⁰⁸ Ntangu yayi, beno ke zola mosi na yankaka? [Dibuundu me tuba, "Amen."—Mu.] Oh, beno pesana mbote mosi na yankaka, mpe beno tuba, "Lukumu na Mfumu."

¹⁰⁹ [Mpangi Branham ke pesa mbote na bantu—Mu.] Lukumu na Mfumu. Lukumu na Mfumu. Lukumu na Mfumu. Lukumu na Mfumu, mpangi-kento. Lukumu na Mfumu. Mu ke na kiesi ti nge me kwisa awa, mpangi-bakala. Lukumu na Mfumu, mpangi-kento. Nzambi sakumuna beno. Mbote mingi. Nzambi kusakumuna beno. Beto ke sala yawu. Nzambi sakumuna beno. Mu zaba nsatu ya beno. Nzambi sakumuna beno. Nzambi sakumuna beno.

Baka Nkumbu ya Yesu na nge,
 Mutindu Kinwaninu ya ngolo;
 Ntangu bakumekama ke kumaka, (Yinki beno
 ke salaka?)
 Niunguta Nkumbu yango ya Santu na
 kisambu.

Nkumbu ya Ntalu, (Nkumbu ya Ntalu!) O
 Nkumbu ya kitoko! (O Nkumbu ya kitoko!)
 Kivuvu ya ntoto mpe kyese ya Mazulu;
 Nkumbu ya Ntalu, (Nkumbu ya Ntalu!) O
 Nkumbu ya kitoko!
 Kivuvu ya ntoto mpe kyese ya Mazulu.

¹¹⁰ Beto kulumusa bayintu ya beto ntangu yayi. Na pima nionso, beto zimbana yawu ve ntangu yayi. Beto yimbila diaka nzila yina.

Baka Nkumbu ya Yesu na nge, (Yinki?)
 Samu ti Kinwaninu ya ngolo; (Ntangu Satana
 ke meka na kuzwa beno na mutambu.)

Ntangu bakumekama ke kumaka, (Yinki beno
ke salaka?)

Niunguta kaka Nkumbu yina ya Santu...
("Samu ti Mfumu keke na ntwala ya kizizi ya
munu; mu ke ningana ve!")

Nkumbu ya Ntalu, (Nkumbu ya Ntalu!) O
Nkumbu kitoko!

Mpangi Neville.



NA MWANDULU YA YANDI KNG62-0909E

(In His Presence)

Nsangu yayi ya Mpangi William Marrion Branham, kulongamaka na Kingelesi, na Lumingu na nokila, na kilumbu ya 9 ya Ngonda ya yivwa, na mvula 1962, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org